

# JUAN JESUCRISTO ENIRUEMO ILLA RAFUE CUIAFUE

## Jesucristo rafue iese tainede

**1** <sup>1</sup>Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. <sup>2</sup>Jusiñamui diga jaca nano ite. <sup>3</sup>Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. <sup>4</sup>Naimie muidona iticai. Naimiena cai iñuamona, jaca iiticai. Lligaiñora diga rana cai ciua isoi, caina Jusiñamuina uiñotade. <sup>5</sup>Naimiena iñoñedino jitiredinomo itimaci isoidimaci. Naimaci comeciaina lligaiñote, naimaci comeciaino ite jeacino oni jaillena. <sup>6-7</sup>Naimaci comeciaina lligaiñotimiena llollena, Juan micori llucacino Jusiñamuina nana comini iñollena, Jusiñamuidi Juan Bautista raillamie micorina oretate. <sup>8</sup>Juan naie lligaiñoñedimie; iadedi Juan naimiena lluaibite. <sup>9</sup>Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. <sup>10</sup>Naimie muidona comini comuidimaci; iadedi naimie bene billa meinocini, comini dinena naimiena uiñoñedimaci. <sup>11</sup>Ie nairai illanomo naimie ride; iadedi nana cai nairai naimiena feiñoñedimaci. <sup>12</sup>Damierie naimiena feiñotimaci. Naimiena iñotimaci. Ie

uaido naimiedi naimacina Jusiñamui uruiaina itatate. <sup>13</sup>Tena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

<sup>14</sup>Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. <sup>15</sup>Juan micori naimiena cominimo jaie llote:

—Birui omoimo lloticue; iadedi jaiimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

<sup>16</sup>Jesucristo caina eo duenaillamona, birui caina eo canocabide. <sup>17</sup>Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluaamona Jusiñamui caina duenaillana jai raise uiñotica. Naimiemona uanaicinona jai raise cacadicai. <sup>18</sup>Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

## Juan Bautista micoridi

### Jesúna llua rafue

(Mt. 3.11-12; Mr. 1.7-8; Lc. 3.15-17)

<sup>19</sup>Jerusalémona Juan micori dine judíuai illaicominidi Jusiñamui diga

ñairainimona dajerie oredimaci.  
Jusiñamui diga ñairaini canorainimona  
dajerie jiai oredimaci. Naimiemo:

—¿Budío? —raillano jicanotadimaci.  
Juan dine rillanona, raitimaci:

—Cai Jilloitaraima biite raillamiemo  
ocuiridicai. Cristo raillamie billemo  
ocuiridicai. ¿Odi naimiedio?

—raillanona jicanotimaci. <sup>20</sup>Naimie  
dinena janoñede; ia:

—Imieñedicue —raite.

<sup>21</sup>Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina  
lloraima ico billena jaie llote. ¿Odi  
naimiedio?

Juan dinena raite:

—Ieñedicue.

<sup>22</sup>Dane jicanotimaci:

—¿Budío? Caimo llono, cai  
oretatinomo cai llollena. ¿Niese  
naimacimo ona lloticai?

<sup>23</sup>Juan dinena raite:

—Jofue iñenanomo ado llotimiedicue.  
Isaías micori jaie llua isoi llocabiticue:  
“Cai Nama biite. Naimie naiso atona  
raise fino”. Iese lloticue; ia naimie uaina  
omoi feiñollena, omoi comeciai raise  
finollena ñaiticue.

<sup>24</sup>Juan dine bitinodi fariseuai comini.

<sup>25</sup>Nia jicanoiacadimaci:

—Odi cai Jilloitaraimañenia, o Elíañenia,  
o Moisés micori llotimieñenia, ¿bue ñellena  
cominina bautizadio? ¿Nie isoide uai omo  
ite? ¿Ninomona o uaina otío?

<sup>26</sup>Juan dinena uai ote:

—Cominina bautizadicue; iadedi omoi  
motomo omoi uiñoñegamie jai ite.

<sup>27</sup>Naimie cue ifo meidoite. Cue baifemo  
faite. Jamai bue cue isoilla jira, naimie  
illafomo cue riñena jira, naimiena  
canonidicue.

<sup>28</sup>Naie rafuedi Betábaramo suide.  
Jordán railla ille ruicafebeimo ite.  
Nainomo Juan bautizauide.

### Juan micori Jesúna dane llua rafue

<sup>29</sup>Ie areruido Juan micoridi Jesús  
naimie dine billana ciuano, naimiena  
raite:

—Ero, Jusiñamui Jito toica llauda  
mamecido jai bite. Cai jeacino facaina  
faga llauda ifomo Jusiñamui ie Jitona  
jai orede. Naimie fallemona comini  
jeacinona dotaite. <sup>30</sup>Navui naimiena  
ñaiticue. Lloticue: “Cue ifo jiaimie  
meidoite. Jamai bue isoindicue; iadedi  
naimie jamai bue isoñede. Cue nia  
jeiciñenia, naimiedi jaca ite”. <sup>31</sup>Cue  
dine naimie nia biñenia, naimiedi cai  
Jilloitaraimana uiñoñedicue; iadedi  
cominina bautizallena bene iticue, cai  
cominimo naimiena llollena.

<sup>32</sup>Juan jiai llote:

—Monamona ucugi isoi Jusiñamui  
Joreño ana billana ciodicue. Jesúmo  
baite. <sup>33</sup>Naimiedi cai Jilloitaraimana nia  
uiñoñedicue; iadedi cominina  
bautizallena, cuena oretagamiedi jaie  
cuemo llote: “Cue Joreño ana billana  
damiemo baillana ico cioitio. Cue Joreño  
baillamiedi cue Joreño omoimo fecaité”.

<sup>34</sup>Naie rafuena ciodicue. Iemona  
naimiedi Jusiñamui Jitonana lloticue.

### Jesús ie fetoacaga comini ie rafue

<sup>35</sup>Ie areruido Juan micori  
llofueoicaiganomona menamie Juan  
micori diga ia, <sup>36</sup>Juan micori Jesús  
macarillana ciuano, raite:

—Ero, Jusiñamui Jito toica llauda  
mamecido jai bite.

<sup>37</sup>Juan micori diga itiaimaiaia niena  
cacajano, Jesúna racadiimaiaia.

<sup>38</sup>Jinafo dine erodajanona, Jesús  
iaimaiaina ciode. Iaimaiaimo jicanote:

—¿Buena jitaídomico?

Iaïmaiaï dinena uai otiïaïmaiaï:  
 —Rabbí, ¿ni o jofo? ¿Ninomo itio?  
 —uai otiïaïmaiaï. Rabbí oni  
 dobaiñuamona: “Llofueraïma raïllamie”.

<sup>39</sup>Jesús nai iaïmaiaï uaina ote:  
 —Mai. Cue diga bi, omico uiñollena.  
 —Ie jira jaidiaïmaiaï. Jesús illanona  
 ciodiaïmaiaï. Jitoma nia a illa jira,  
 nairuido naimie diga fiebidiaïmaiaï.  
 Jitirecaidemo oni jaidiaïmaiaï.

<sup>40-41</sup>Naie iaïmaiaïmona damie  
 Andréna mameciredimie. Jesús dinena  
 naimie jaidemo, ie ama nano jenuaide.  
 Naimie amadi Simón Pedro. Naimiena  
 baïllanona, llote:

—Jai cai cominina Jilloitaramana  
 baiticue. Cristo raïllamiena baiticue.

<sup>42</sup>Ie mei Jesús dine naimiena uite.  
 Jesús naimiena eo eruaiïllanona, raite:

—Birui o mamecidi Simón. Juan ie  
 jitodio. Biruimona Cefana jiaï  
 mamecirenitio —raite. Oni dobaiñuacidi  
 Pedro.

**Jesús menamie uaidua raufe**

<sup>43</sup>Ie areruido Jesús Galileamo  
 jaiacade. Felipeña baïllanona raite:

—Cue llofuegamiena o jaïllena, cue  
 diga coco jaïllesa, mai cue diga bi.

<sup>44</sup>Felipedi Betsaida nairai imie. Andrés  
 iaïmaiaï Pedro diga daje nairai iaïmaiaï.

<sup>45</sup>Jesús naimiemo llua mei, Felipedi  
 Natanaelna oni jenuaide. Higuera raïlla  
 riará anamo naimiena baïllanona, raite:

—Moisés micori jaie cuegamiena jai  
 baiticue. Jusiñamui lloraini micoriaidi  
 naimiena jaie jiaï cuetimaci. Naimiedi  
 Jesús. Nazaret imie. Ie moodi José.

<sup>46</sup>Natanael naie nairaina uaitajanona  
 raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

<sup>47</sup>Jesúmona iaïmaiaï iaïre ia, Jesús  
 dinena llote:

—Ero, buna jifueñegamie billa.  
 Nanoca Israel imie bite.

<sup>48</sup>Natanael dinena uai ote:

—¿Bu cuena llogao? ¿Niese cuena  
 uiñotio?

Jesús uai ote:

—Felipe ona ailli nia baiñenia, higuera  
 raïlla riará anamo o illana jai uiñoticue.

<sup>49</sup>Jacinaïllamona, Natanael dane uai  
 ote:

—Maestro, odi Jusiñamui Jitodio. Cai  
 comini illaimadio.

<sup>50</sup>Jesús dinena uai ote:

—Amena anamo o illana cue uiñua  
 jira, cuena iñotio. Diga siño rafuena  
 ciojotio. Bie rafue baïfemo finuana  
 ciojotio. <sup>51</sup>Jusiñamuimona billanona,  
 iimana jaidicue. Uanaicino omo lloticue.  
 Mona ecorillana o cioia, Jusiñamui  
 jaienisai cue dine billena cioitio.  
 Cuemona abido jaïllena jiaï cioitio.

**Jinuimona Jesús vino finua rafue**

**2** <sup>1</sup>Menarui illanona, Galileamo  
 Canámo iima ie ai uarafue ite.  
 Rafue nama uaidua jira, nainomo Jesús  
 ei jaide. <sup>2</sup>Jesús jiaï uaidoga. Ie  
 llofueoicaiganodicai jiaï uaidogacai.  
<sup>3</sup>Vino cueïllamona, Jesús ei Jesúmo  
 llote:

—Vino jai iñede.

<sup>4</sup>Jesús dinena uai ote:

—Quei, ¿bue ñellena iese cuemo  
 llotio? Siño rafue cue finolle facaisedi  
 nia riñede.

<sup>5</sup>Iemei ie eidi rafue nama mullaiaïmo  
 llote:

—Naimie omoïmo lluaña fino.

<sup>6</sup>Jinui nainomo eenollena, nainomo  
 seis noficimona finoca llerodana  
 raisoide. Naiemona jinuína ouidimaci.  
 Marena illena, cai einamací llua isoi,  
 jofomo naimaci ría, naimaci abiaína  
 llereuidimaci. Naga lleroda nibai cinco  
 latas totaca. <sup>7</sup>Mullaiaïmo Jesús llote:

—Naie llerodaiaina jinui diga oruita.  
—Pozomona jinui atiano, naie llerodamo toidimaci.

Iena finua mei, <sup>8</sup>Jesús naimacimo lloste:  
—Llerodamona janore jisa uanona, rafue nama dine uiño.

<sup>9</sup>Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaia uiñotimaci. Jirua mei, ai otimie uaiduano, <sup>10</sup>raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

<sup>11</sup>Galileamo Canámo Jesúdi siño rafuena nano finode. Iemona caina ie uai siñona uiñotade. Ie muidona naimie siño Jitonana iñoticaia.

<sup>12</sup>Rafue fuilla mei, Capernaumo Jesús ie ei diga, ie amatiaia diga, ie llofueoicaiganodicaia diga jaide. Nano nigarui nainomo iticaia.

**Jusiñamui jofomona Jesúdi rana  
fekarainina dotaja rafue**  
(Mt. 21.12-13; Mr. 11.15-18;  
Lc. 19.45-46)

<sup>13</sup>Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. <sup>14</sup>Rillano, Jusiñamui jofomo diga rana fecarainina ciode. Ucube ollena, nainomo juraretaiaia, toica llaudaiaia, ucugiaia fecauidimaci. Ucubena meidorainidi jiaia itimaci.

<sup>15</sup>Naimaci ocainiaia diga naimaci jino jiullena, rao Jesús uanona, iena lleride. Naimaci ucubena judaide. Mesaiaina oni caitade. <sup>16</sup>Ucugiaiaina fecarainimo lloste:  
—Omoi ucugiaiaina jino uiño. Cue Moo jofomo ra feca-fecajana jitaiñedicue —lloste.

<sup>17</sup>Iemo Jusiñamuina lloraini micoriaia cuegafuiaina jai comeciticaia. Iese jaie cuega: “O jofona cue riiduamona, jiaino cuena meinetaitimaci”. <sup>18</sup>Nainomo ite judíuai illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñollena. <sup>19</sup>Jesús uai ote:

—Bicona judai. Darui amani maijiamona iena dane nillana fuidoiticue.

<sup>20</sup>Dane raitimaci:

—Cuarentiséis años bicomo maijidimaci, iena finollena. ¿Niese iena darui amani illanona, iena dane nillana fuidoitio?

<sup>21</sup>Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

<sup>22</sup>Jesús fiodaillamona naimie jillua mei, ie llofueoicaiganodicaia bie lluacinona comeciticaia. Ie jira naie cuegafuena iñoticaia. Jesús lluacinona jiaia iñoticaia.

**Jesúdi comini comeciaino iticino  
lluana jitaiñena rafue**

<sup>23</sup>Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina iñotimaci. Coniniri raitimaci:

—Naimiedi cai Jilloitaraíma.

<sup>24</sup>—Naganomo comeciaino naimaci facaja jira, naie cominina naimie uiñuamona, Jesús naimaci motomo iacaiñede.

<sup>25</sup>Naimaci comeciaino iticinuaína naimie eo raise uiñua jira, comini rafuena naimiemo bu lluaana jitaiñede.

**Nicodemo Jesús diga ñaia rafue**

**3** <sup>1-2</sup>Judíuai illaicominimona damiedi Nicodemo. Naimiedi fariseo imie. Naíona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

<sup>3</sup>Jesús dinena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeiciñenia, Jusiñamui ie cominina sedajanomo jaca initio.

<sup>4</sup>Nicodemo abido jicanote:

—¿Niese eimie ie ei jeraimo dane iite?  
¿Niese dane comonori jeiciite?

<sup>5</sup>Jesús uai ote:

—Uanai omo lloiticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. <sup>6</sup>Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. <sup>7</sup>Omo dane lloiticue: Comonori jeicia. Ieri rajicaiñeno. <sup>8</sup>Iena o raise cacaillena, jiaie rafuedo iena lloiticue. Aifidi ie jitaila dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

<sup>9</sup>Nicodemo dane jicanote:

—¿Niese biedi dane iite? Raise cacaiñedicue.

<sup>10</sup>Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloiticue; ia iena raise cacaiñedio.

<sup>11</sup>Uanaicinona omo lloiticue. Abi uiñuamona omo lloiticue. Cue ciua rafuena lloiticue; iadedi cue lluaña uiñoñedio. <sup>12</sup>Bene ite rafuena cue lloia, iena iñoñediota, monamo ite rafuena cue lloia, iena jiai raise iñoñeitio.

<sup>13</sup>Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue.

<sup>14</sup>Monamona biticue; ia amenamo fiadaiticue. Jofue iñenanomo Moisés

micori jαιο joreño amenamo jaiie cuinade. Jaioniai ainillamona comini fiadaiñellena iena cuinade. Comini ie isoi jilloillena, ie isoi cuena coraitimaci. <sup>15</sup>Cue fiadailamona bu cue uaina iñoia, monamo jaca iite.

#### **Jusiñamuidi cominina eo isiruilla rafue**

<sup>16</sup>Jusiñamuidi cominina eo isiruilla jira, comini dine ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca iitimaci. Jiai faifñeitimaci. <sup>17</sup>Naimacina duere finotallena ie Jitona oreñede; iadedi naimaci jeacinomona jilloillena, naimiena orede. <sup>18</sup>Jusiñamuidi Jesús uaina iñotinona jaca duere fiñoñeite; iadedi ie dajede Jitona uaina naimaci iñoñena jira, Jusiñamui duere finollicino anamo jai itimaci. <sup>19</sup>Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite; iadedi naimaci comeciaino jitiñedinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. <sup>20</sup>Naimie finoca rafue bai raillano, naga jeacino finoraime ie comeci lligaiñuana jitañede; <sup>21</sup>ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

#### **Juan micoridi Jesúna dane ñaia rafue**

<sup>22</sup>Digarui illanona, Jesús ie llofueoicaiganodica diga, Judea railla eniruemo macaricana jaidica. Nainomo diga irui fiebidica. Llofuiamona iñotinona bautizacana uitica. <sup>23-24</sup>Nia cárcelmo iñenia, ailluena jinui nainomo

illa jira, Enón railla nairaimo bautizajanomo Juan micori jiai ite. Salim railla nairai iairei ite. <sup>25</sup>Naie facaise Juan micori llofueoicaigano judúuai imie diga bautizajana siadotimaci. <sup>26</sup>Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

<sup>27</sup>Juan uai ote:

—Jusiñamui ie uai fecañedena, Jusiñamui facaina buna jaca buena finonide. <sup>28</sup>Cue lluana navui cacadomoi.

Lloticue: “Cai comini Jilloitaraimañedicue. Cristoñedicue. Naimie billena cue llolena, Jusiñamuidi naimie uicomo cuena orede”. <sup>29</sup>Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúsuo jaioidimaci. Naimiemo jai duidimaci. Iena cue cacajamona, ieri iobidicue. <sup>30</sup>Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue.

<sup>31</sup>Jamai comediecue. Ie jira enirueo ite rafuena llocabiticue. Jusiñamuimona Jesús billa jira, cai baifemo faite. <sup>32</sup>Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena iinotimaci.

<sup>33</sup>Naimiena iinotimiedi Jusiñamui uanaicinona lluana raise uiñote.

<sup>34</sup>Jusiñamuidi ie Joreño ie Jitomo caidñeno fecaja jira, naimie Jusiñamui uaina llocabite. <sup>35</sup>Jusiñamuidi ie Jitona isiruite. Ie jira naga rafue naimiemo fecade. <sup>36</sup>Bu Jusiñamui Jitona iñoia, Jusiñamui illanomo jaca iite; iadedi bu

naimiena iñoñenia, Jusiñamui illanomo jaca iñeite. Jusiñamui riicaillafue anamo jai ite.

#### Galileamo Jesús jailla rafue

**4** <sup>1-2</sup>Naie facaise ailluena comini Jesúsomona fueotimaci. Iemei naimie díbeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicai bautizadicaí. Fariseuai bie rafuena fidiano, iena Jesús uiñua jira, <sup>3</sup>Judeamona Galileamo Jesús cai diga dane abido jaide.

#### Samaria iñaiño diga

##### Jesús ñaia rafue

<sup>4</sup>Galileamo jaillena, Jesúsdi Samaria railla enirue díbeido jaiacade. <sup>5</sup>Samarimono cai ria, Sicar railla nairaimo iairei rillano, daje pozomo ridicaí. Naie pozodi Jacob micori jaie finoca. Jacob micori naie pozo illano ie jito José micorimo jaie fecade. <sup>6</sup>Jitoma naidai itemo, naie pozo fueo cai rillano, Jesús ana raide. Are macarillanona, jafaici ote. <sup>7-8</sup>Jesús pozomo fiebicaiilla meinona, Sicarmo jaidicaí, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiño mo jicade:

—Jinuina cue ine, cue jirolesca.

<sup>9</sup>Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuina jicadio?

—Naiñaiño iese raite, judúuai Samaria comini diga ñairainina jira.

<sup>10</sup>Jesús dinena dane uai ote:

—Jusiñamui omo fecacalle ra uiñotiodena, o diga ñaitimiena uiñotioña, cuemo jaca itataite jinuina cuemo jicadio. Iemei omo iena fecadicue.

<sup>11</sup>Naiñaiño uai ote:

—¿Ñiese bie pozomona jinuina oitio? Eo ana ite. ¿Ninomona jaca itataite

jinuina oitio? <sup>12</sup>Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruiaí micoriai jiai naiemona jirodimaci. Ie ocainaiái dajemona jiai jirodimaci. Cai usuma micori baifemo fañedio —raite.

<sup>13</sup>Jesús uai ote:

—Nagamíai bie jinui jirua mei, dane jiroacanite; <sup>14</sup>iadedí cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

<sup>15</sup>Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

<sup>16</sup>Jesús dinena uai ote:

—O jofomo mai jai. O ini diga abido bene bi.

<sup>17</sup>Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidío. <sup>18</sup>Cinco diga inina jai faicaidío. Birui o diga itimiedí jiai o iniñede. Uanaicinona ua llotio.

<sup>19</sup>Iemona abina uiñoacaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. <sup>20</sup>Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicaí; iadedí omoi judíuai dinena raitomoi: “Jerusalémo Jusiñamuina cai sedauilla”.

<sup>21</sup>Jesús dinena dane uai ote:

—Cuenta ñno. Jiairuido bai bene ite anedumo cai Moona sedañeitomoi. Jerusalémo naimiena jiai sedañeitomoi.

<sup>22</sup>Raise uiñoño Jusiñamuina biruido sedadomoi; iadedí cai nairaimona cai Jilloitaraima illa jira, naimiena raise uiñuana sedadicaí. <sup>23</sup>Jiairuido, ua birui, cominidí: “¿Ninomo Jusiñamuina

sedaiticaí?” raillamo comeciaina facañeitimaci. Naimaci comeciai jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. <sup>24</sup>Jusiñamui comeñede. Naimiedi jafaici. Omoi comeciai jitaillamona naimiena omoi sedajana jitaide.

<sup>25</sup>Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena caína raise uiñotaite.

<sup>26</sup>Jesús raite:

—Naimiedicue.

<sup>27</sup>Ieconí abido ridicaí. Riño diga Jesús ñaía jira, rajicaidicaí; iadedí: “¿Buena naiñaiño jitaide?” raillano jicanoñedicaí. “¿Buena ñaitomico?” raillano jiai jicanoñedicaí. <sup>28</sup>Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo lloite:

<sup>29</sup>—Ailli pozo fuemo cue jaca cioirainamie diga dafaifidicue. Nana cue finouiga rafue diese cuemo lloite. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

<sup>30</sup>Ie jira Jesús dine ailluena comini bitimaci. <sup>31</sup>Naie riño ie nairai dine jailla mei, abido cai dine nia riñenia, Jesúsna raiticaí:

—Maestro, mai guíno.

<sup>32</sup>Naimie uai ote:

—Cuemo guille illana uiñoñedomoi.

<sup>33</sup>Coniniri siadoticaí:

—Jai nibai bu ecajaibiga.

<sup>34</sup>Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue lluamona, jai guiticue isoidicue. <sup>35</sup>Comecina facadomoi: “Jusiñamui uaina nia

lloñeiticai. Ico iena lloiticai”. Ie isoide. Illimo riará nia llisiñenia, comeciaina facadomoi: “Riara einallena, naga amaga fivui fiebite. Naie facaise maijíticai”. Omoimo lloticue: Omoi ecimo eruai. Riara jai einaite isoide. Naimacimo Jusiñamui rafue lollena, iena naimaci ñnollena, ailluena comini jai itimaci. <sup>36</sup>Naie llisillamo maijítimiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaino billamona, iena dane cacajamona, iena ñnotimaci. Naie mare rafue lloraini íbana feiñoitimaci. Jusiñamui díbeimo naimaci dajena maijía jira, dajena iobitimaci. <sup>37</sup>Cai comini iena raicabitimaci: “Damie iduaina rite; ía jiainie llisillana ote”. <sup>38</sup>Ie isoide. Omoína oredicue, comini cue díbeimo itatallena. Naimacimo cue uaina nano lloñedomoi; íadedi nano jiaino naimacimo cue uaina llotimaci. Ie jira nana omoi llofuiamona cue uaina ñnoitimaci.

<sup>39</sup>Samaria ññaiño llumona, naiñaiño nairaimona ailluena comini Jesúna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraima” raillanona Jesúna ñnotimaci. <sup>40</sup>Jesús dine naimaci rillanona, naimaci díga naimie fiebillena, Jesúmo jicanotimaci. Ie jira Jesús menarui naimaci dínomo fiebide. <sup>41</sup>Naimie llofuiamona, jiaie ailluena comini naimiena ñnotimaci. <sup>42</sup>Riñoimo llotimaci:

—Daño o llumona, navui ñnoticai; íadedi naimie uaina cai cacajamona, birui raise ñnoticai. Naimiedi comini ua Jilloitaraima.

<sup>43</sup>Menarui illanona, nainomona Galileamo Jesús cai díga jaide. <sup>44</sup>Caimo llote:

—Jusiñamuina lloraímadi ie nairai illanomo ía, naie comini naimie llumamo cacarefiacaiñedimaci; <sup>45</sup>íadedi Galileamo cai rillanona, nainomo itino naimiena caimare feiñoitimaci. Pascua railla rafue facaise Jerusalémo nana naimie finoca rafue navui naimaci ciua jira, naimiena caimare feiñoitimaci.

**Jesúdi illaicomini  
jítóna jillotaja rafue**

<sup>46</sup>Galileamo Jesús cai díga macaría, dane Canámo ridicai. Nainomo jinuímona vino navui finode. Nainomo cai ía, Capernaum railla nairaimo itimie jito duide. Duidimie moodi gobierno díga maijiuide. <sup>47</sup>Judeamona Galileamo Jesús illana naimie fidiano, Canámo bite. Jesús illanomo billena, íe jito jai fiodiaicana jira, íe jítóna jillotallena Jesúmo duere jicanote. <sup>48</sup>Jesús naimiemo llote:

—Siño rafuena omoi cioiñenia, cuena ññoñedomoi.

<sup>49</sup>Uai ote:

—Maestro, cue díga bí, cue jito fiodiañllesa.

<sup>50</sup>Jesús uai ote:

—Mai jai. O jito jai fiodiañeite —llote. Naie íima Jesús uaina ñnuano, íe jofomo abido jaide. <sup>51</sup>Naisona naimie jaidemo, íe mullaíai díga afeedo beici dafaífide. Llotimaci:

—O jito jai jillode.

<sup>52</sup>Ie jira naimie jicanote:

—¿Nino jítóna ítemo, jillode?

Uai otimaci:

—Navui are jítóna oni lluai caidemo, abí cuarilladi fainonocaide.

<sup>53</sup>Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaíai lluaña cacajamona, naimiedi Jesúdi cai Jilloitaraimana ñnote. Nana naimie jofomo itino jiaí ñnotimaci. <sup>54</sup>Judeamona Galileamo



Jesús abido billano, siño rafuena iese jai finode.

### Joraibimo tisitaitimie jillua rafue

**5** <sup>1</sup>Digarui illa mei, cai judúuai rafue iacana jira, Jerusalémo Jesús abido jaide. <sup>2</sup>Jerusalémo toica llaudaiai jaisoilla nase facaimo joraibi ite. Cai judúuai uaimona nai joraibi mamecidi Betesda. Naie jorai fuedo ite cinco jifocotiai. <sup>3</sup>Nainomo diga duidino biidimaci: uisinidimaci, ñuja-ñujacaidino, tisitaitino. Jinuina begollena sedadimaci. <sup>4</sup>Feide isoidemona dacaiño Jusiñamui jaienici jinuina begotallena bite. Iemei nai jinuimo nano jaidimie ie duicomona jillode. <sup>5</sup>Duidino motomo tisitaitimie ite. Treintiocho años duide. <sup>6</sup>Naimiena ciuano, naimie are duillana uñuamona, Jesús naimiemo jicanote: —¿Jilloiacadio?

<sup>7</sup>Duidimie uai ote:

—Jii; iadedi jinuina begoia, jaca buna ñeude cue canoitena. Ie jira jiaimiedi cue uicodo jinuimo jaide. Ie jirari nia jilloñedicue.

<sup>8</sup>Jesús uai ote:

—Mai naidacai. O biira ferinocaida macari.

<sup>9</sup>Iecon naimie jillode. Ie biira ferianona oni jai macarite.

### Sábadoruimo duidimie jilloitajana siadua rafue

Sábadoruimo, judúuai jafaici ouillarurimo, naimie jillode. <sup>10</sup>Ie jira judúuai illaicominidi jillodimiemo llote:

—Birui sábado. O biira abinocaida o uilla jira, Moisés micori rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

<sup>11</sup>Naimie uai ote:

—Cuenta jilloitaimie cuemo llote: “O biira mai ferinocaida macari”.

<sup>12</sup>Judúuai dinena jicanote:

—¿Bu iena omo llote? —Naimie uññoena jira, uai oñede.

<sup>13</sup>Jesúdi comini motomo itabilla jira, ailluena comini illa jira, jai jillodimie ie jilloitaimiena uññoñede. <sup>14</sup>Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

<sup>15</sup>Ie mei judúuai illaicominimo jillodimie lluaide. Llote:

—Jesús raillamie cuena jillote.

<sup>16</sup>Sábadoruimo Jesús bie rafuena finua jira, judúuai illaicominidi naimiena duere finoacasite. <sup>17</sup>Jesúdi abina riiduan llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. <sup>18</sup>Sábadoruimo naimacimona Jesús maijia jira:

“Jusiñamuidi cue Moo” naimie railla jira: “Jusiñamuidicue” naimie railla jira, judúuai illaicomini naimie meinellena eo jitauidimaci.

### Jesús ie Moo isoi finua rafue

<sup>19</sup>Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. <sup>20</sup>Cue Moo cuena isiruillanona, nana ie finoca rafuena

cuena jai uñnotade. Naimie Jitona cue illa jira, bie iimana cue jilloitaja baifemo jiaie siño rafuena finoiticue, omoi raijicaillena. <sup>21</sup>Fiodaitinona jilloitallena, cue Moomo ie uai ite. Naie uai cuemo jiai ite. <sup>22</sup>Cue Moo juez isoi naimie iñoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. <sup>23</sup>Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuenta

omoi iobitañenia, cue Moona jiai iobitañedomoi. <sup>24</sup>Uanaicinona lloticue. Cue uaina bu cacacia, cuena oretatimiena bu iñoia, monamo jaca iite. Jearede rafue naimie finua facaina duere sefuñeite. Faiñeite; ia monamo Jusiñamui diga jaca iite. <sup>25</sup>Uanaicino lloticue. Jusiñamui Jitodicue. Ua birui cuena iñoñedino cue uaina cacareitimaci. Cuena cacajamona, cuena iñuamona, jaca iitimaci. <sup>26</sup>Cominina jaca itatallena, cue Moomo uai ite. Comini jaca itatallena, cuemo ie uai jiai iga. <sup>27</sup>Cuena iñoñedinomo juez isoi cue llollena, naimiemo cue duillamona, ie uai cuemo jiai iga. <sup>28</sup>Ieri rajjicaiñeno. Jiairuido nana jai fioidaitino diese cue lluana cacaitimaci. <sup>29</sup>Fiodaillamona naimaci abiai jilloitimaci. Ie mei cue jitaillacinona finodino jaca illena lloticue. Cue jitaillacinona finoñedino diese duere sefuillena lloticue. <sup>30</sup>Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie llucinodi uanaicino.

**Jusiñamui ie Jito uaina  
comini iñoñena rafue**

<sup>31-32</sup>Jesús nia llote:

—Dama cue abina cue lloiadedi, bu cuena jaca iñoñede; iadedi Jusiñamui cue facaina jiai llote. Naimie llucino uanaicino. Iena uiñoticue. <sup>33</sup>Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan llucinodi uanaicino. <sup>34</sup>Naimie micori cue rafuena llouide; iadedi naimie micori llogacinomo omoi comeci eo facajana birui jitañedicue. Cuena omoi iñollena, naimie mamecina jai lloticue. <sup>35</sup>Lamparín raise lligaiñua isoi, ie rafuedo Juan micori omoi

comeciaimo iticinona raise uiñotade. Dallu ieri iobidomoi. <sup>36</sup>Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomoi. <sup>37</sup>Cue finoca rafue muidona cuena uiñotomoi; iadedi naimie lluana jaca cacaiñedomoi. Naimiena jiai jaca cioñedomoi. <sup>38</sup>Cuena omoi iñoñena jira, naimie uaina feiñoñedomoi. <sup>39</sup>Jusiñamui dine omoi rillena, Jusiñamui facaina lloraini micoriai cuegafuiaina facacabidomoi. Naifuiaidi cuena ñaite; <sup>40</sup>iadedi Jusiñamui dine omoi rillena, cue uaina iñoiacaiñedomoi. <sup>41</sup>Cuemo iobillacinona omoi fecallena sedañedicue. <sup>42</sup>Jusiñamuina isiruñedomoi. Iena uiñoticue. <sup>43</sup>Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomoi. <sup>44</sup>Jaca iñoiacaiñedomoi. Iobillacino coninimo fecadomoi; iadedi ua Jusiñamuidi omoina “Mare” raillana jitañedomoi. <sup>45</sup>“Cue Moomo omoi maraiñede finoca rafuena lloticue” raillanomo comeciaina facañeno. Moisés micori cuegafuiaimo omoi llogiduafue jai ite. Moisés micori cuegafuiai muidona Jusiñamui dine omoi jaca illemo ocuridomoi. <sup>46</sup>Moisés micori cuegafuiaina iñotomoina, cuena naimie micori cuia jira, cuena jiai iñoitomoi. <sup>47</sup>Naimie cuegafuiaina iñoñedomoi. Ie jira cuena jiai iñoñeitomoi —llote.

**Jesús cinco llomenicomona  
ailluena cominina eaja rafue**

(Mt. 14.13-21; Mr. 6.30-44;

Lc. 9.10-17)

**6** <sup>1</sup>Jiairuido Galilea railla jorai ie ruica dibeimo Jesús ie llofueoicaiganodicaí diga jaide. Naie

goraidi jiai Tiberiana mamecirede.  
<sup>2</sup>Duidinona naimie jillotauillana naimaci ciua jira, ailluena comini naimiena racadimaci. <sup>3-4</sup>Naie facaiseconi pascua railla rafuedi jai iaire ite. Jesús cai diga anedumo a jaillanona, dinomo ana raide. <sup>5</sup>Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicono oiticaí?

<sup>6</sup>Naimiena facacillena, iena jicanote; iadedi Jesús ie finolle rana jai uiñote.

<sup>7</sup>Felipe uai ote:

—Janore naimaci guillena, doscientos digarui ie maijia ucube diese llomenico oiticaína, baiñede.

<sup>8</sup>Naie facaise caimona damie iena cacade. Naimiedi Simón Pedro ama. Andréna mamecirede. Naimie raite:

<sup>9</sup>—Cinco cebadamona finoca jenide llomenico daje uruemo bene ite. Mena lliciaí jiai naimiemo ite; ia ¿niese nibaiiticaí? Baiñeite.

<sup>10</sup>Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci. <sup>11</sup>Llomenicono Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caina naie llomenicono fecatate. Comini jitailla dierise lliciaí daje isoi fecatate.

<sup>12</sup>Naimaci monillamona, caimo Jesús llote:

—Buena jaca faifiñellena, fiebide guille danomo irai.

<sup>13</sup>Ie jira iena iraidicaí. Naie cinco llomenicomona, comini guigamona fiebidemona, doce cirigaíaimo oruitaticaí. <sup>14</sup>Jesús finoca rafuena naie cominidi ciuanona, llotimaci:

—Jusiñamui facaina lloraini micoriaídi cai Jilloitaraima ico billena jae llotimaci. Bimiedi naimie.

<sup>15</sup>Naimaci illaimana naimie illena, naimiena gaitaacadimaci. Iena naimie uiñua jira, iena naimie jitaíñena jira, aneduaímo naimie oni jaide.

### Capernaumo Jesús abido jailla rafue

(Mt. 14.22-27; Mr. 6.45-52)

<sup>16</sup>Jitoma ana itemo, jai navuidemo, ie llofueoicaiganodicaí joraimo jaidicaí.

<sup>17</sup>Cai botemo cai jaillano, ruica Capernaumo jaiacadicaí; iadedi Jesús nia biñede. Jesúsna sedadicaímo, naimie biñena jirari, jai jitreña facaiseconi jai jaidicaí. <sup>18</sup>Raire aifi illa jira, jori ei bagode. <sup>19</sup>Nibai cinco, nibai seis kilómetros jaidicaímo, damie cai dine jinui emododo billana ciodicai. Bote dine naimie billana ciuanona, jacinaiticaí. <sup>20</sup>Jesús caimo llote:

—Jesúdicuesa. Jacinaíñeno.

<sup>21</sup>Iena cacajanona, botemo naimiena a billana jitaídicai. Ieconu ruica dine cai jaiacananomo ridicaí.

### Comini Jesúsna jenua rafue

<sup>22-24</sup>Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúsna naimaci cioíñena jira, cai jiai iñena jira, naie botiaído Capernaumo Jesúsna jenollena, jaidimaci.

### Jesús: “Llomenicodicue” railla rafue

<sup>25</sup>Ruica dine Jesúsna comini baillanona, jicanotimaci:

—¿Niruido bene ridio? <sup>26</sup>Jesús uai ote:

—Navui are omoína cue ecajamona, iemona omoí monillamona, cuena

jenodomoí. Siño rafuena cue finuana ciodomoí; iadedí cuena nia iinoñedomoí. <sup>27</sup>Guille raire cueicabide. Cueiruide ramo comeaiaina eo facañeno. Cueiruiñede ramo comeaiaina eo faca. Jusiñamui diga omoi jaca illemo comeaiaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iinuamona, Jusiñamui diga jaca iitomoí.

<sup>28</sup>Jicanotimaci:

—Nia Jusiñamui díbeimo iticaina, ¿nie isoidífue finodicaina mare?

<sup>29</sup>Jesús uai ote:

—Naimie oretagamie uaina omoi iinuana jitaide.

<sup>30</sup>Naimaci dínena dane jicanotimaci:

—¿Nie isoide rafuena finoitio? iena cai ciuano, o uaina cai iinollena. <sup>31</sup>Cai jaiagai jofue iñenanamo Jusiñamuimona bite guilla ra guisoidimaci. Moisés micori iena jaie cuega: “Jusiñamuimona bite guiga ra naimacimo nagarui fecauide”. Iemo jiai birui ocuiridicai. Naie isoide siño rafuena o finuana jiai cioacadicaí —llotimaci.

<sup>32</sup>Jesús uai ote:

—Uanaí lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoímo jai feacaade.

<sup>33</sup>Jusiñamui feacaacalle llomenico monamona jai bite. Comini iena guillamona, jaca iitimaci.

<sup>34</sup>Llotimaci:

—Nagarui caimo bie isoide llomeniconona feca.

<sup>35</sup>Jesús uai ote:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoí. Cuena iinotimie dane aimetañeite. Cuena isiruitimie jaca dane jiroacaiñenite. —Iese lloite; ia

naimaci comeaiaina ñaite. Naimaci comeai jitaillacino naimacimo jaca illena ñaite—. <sup>36</sup>Cuena ciodomoí; iadedí cuena iinoñedomoí. <sup>37</sup>Nana cue díbeimo cue Moo itatallinodí cuena iinoitimaci.

Cuemona naimacina jaca oni dotañeiticue. <sup>38</sup>Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. <sup>39</sup>Cuena oretatimiedi cue díbeimo itatallinomona buna faifillana jitañede. Jusiñamui lluaruimo fiodaillamona nana naimaci abiaína cue jilloitajana jiai jitaide. <sup>40</sup>Jusiñamui Jitona cue illana bu iinoia, cuena bu iinoia, monamo jaca iite. Jusiñamui lolliruimo fiodaillamona naimie abina jillotaiticue. Iese cue Moo jitaide.

<sup>41</sup>Jesúdi: “Monamona bite llomenicodicue” railla jira, judíuai illaicominidí naimie uaina jamaillano iinosiñede. <sup>42</sup>Raitimaci:

—Bimiedi Jesús. José jito. Ie moona uiñoticai. Ie eina jiai uiñoticai. ¿Niese naimiedi: “Monamona biticue” raite?

<sup>43</sup>Jesúdi uai ote:

—Iese omoi naiñeno. <sup>44</sup>Naimiena cue Moo iinotañenia, bu cuena iinonide.

Cuena bu iinoñenia, Jusiñamui lolliruimo fiodaillamona naimie abina jillotaiticue. <sup>45</sup>Jusiñamuina lloraini micoriai jaie iena cuetimaci:

“Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai iinoite. <sup>46</sup>Buna cue Moona jaca cioñede. Naimiemona cue billamona, dama cue ciua. <sup>47</sup>Uanaicinona lloticue. Cue uaina iinotimie monamo jaca iite.

<sup>48</sup>Jesús dane lloite:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoí. <sup>49</sup>Jofue

iñenanomo omoi jaiagai  
 Jusiñamuimona bite rana guisoidimaci;  
 iadedi fiodaitimaci. <sup>50</sup>Birui jiaie guille  
 ra ite. Monamona ite. Tena bu guia,  
 monamo jaca iite. <sup>51</sup>Bie llomenicodi  
 cue. Monamo cominina jaca itatallena,  
 monamona biticue. Bu bie isoide  
 llomenicona guia, jaca iite. Bie  
 llomenicodi cue abi. Comini facaina  
 fiodaiticue.

<sup>52</sup>Iena cacajano, judíuai illaicomini  
 coniniri naiena siadotimaci. Raitimaci:  
 —¿Niese bimie abina riiticaí?

<sup>53</sup>Ie jira Jesús dinena raite:  
 —Uanai lloticue. Cue abina omoi  
 riñenia, cue diruena omoi riñenia, cue  
 Moo diga jaca iñeitomoi. <sup>54</sup>Bu cue abina  
 riia, bu cue diruena riia, cue Moo diga  
 jaca iite. Fiodaillamona naimie abi  
 iirairuimo jillotaiticue. <sup>55</sup>Cue abidi ua  
 rille. Cue diruedi ua rille. <sup>56</sup>Bu cue  
 abina riia, bu cue diruena riia, cuena  
 nabaide. Naimiena jiai nabaidicue.  
<sup>57</sup>Cue Moo cuena orede. Naimiedi jaca  
 ite. Cue Moo jaca illa jira, cue jaca  
 iticue. Daje isoide. Bu cue abina riia,  
 cue illamona, naimie jiai iite. <sup>58</sup>Bie  
 isoide guille ra monamona jai bite.  
 Omoi jaiagai jaie guiga ra isoíñede. Jaie  
 fiodaitimaci; iadedi bie guille ra birui  
 bu guia monamo jaca iite. —Iese lloite;  
 iadedi naimie fiodaillamona, naimiena  
 comini iinuamona, Jusiñamui diga  
 naimaci jaca illena ñaite.

<sup>59</sup>Capernaumo judíuai ofiracomo  
 Jesús biena lloite.

**Jesús diga jaisoidino  
 naimie llua na siadua rafue**

<sup>60</sup>Jesús diga jaisoidino naimie llua na  
 cacajano, coniniri siadotimaci:  
 —Bie llua eo irirede. Bu iena  
 cacaiñede.

<sup>61</sup>Jesúdi naimaci iese siaduana uiñote.  
 Ie jira lloite:

—Cue llua na raise iñoñedomoi.  
<sup>62</sup>Jusiñamuimona iimana jaillena jai  
 biticue. Monamo abido ico cue jaillena  
 cioitomoina, iena jiai nibai raise  
 iñoñeitomoi. <sup>63</sup>Cai joreño caimo  
 illamona, iticaí. Dani cai abi diga iñedicaí.  
 Ie isoide. Cue llogacino Jusiñamuimo  
 duide. Iena omoi iinuamona, jaca iitomoi;  
<sup>64</sup>ia omoimona nana iñoñedomoi —lloite.  
 Nano dofoconimona Jesúdi naimiena  
 iñoñedinona uiñote. Naimiena  
 gaitataitimiena jiai uiñote.

<sup>65</sup>Jesús dane lloite:

—Ie jira omoimo lloticue: Cue Moo  
 jitaiñenia, cuena jaca bu iñonide.

<sup>66</sup>Iena cacajano, Jesús diga  
 jaisoidinomona, diga comini naimiena  
 fainonocaidimaci. <sup>67</sup>Ie jira ie doce  
 llofueoicaiganodicaimo Jesús jicanote:

—¿Jiai cuena fainonocaida, abido  
 jaitomoi?

<sup>68</sup>Simón Pedro uai ote:

—Nama, o diga cai jaiñenia, ¿bu diga  
 jaiticaí? Jusiñamuimo cai rillena, o isoi  
 Jillotaraíma iñede. Jiaimie mo jaca  
 itatajaracinodi iñede. <sup>69</sup>O llua na jai  
 iñoticaí. Jusiñamui mare Jitodio. Iena  
 uiñoticaí.

<sup>70</sup>Jesús dane uai ote:

—Doce digamie fetocaomoi; iadedi  
 omoimona damie Taifemo jainaiade  
 —lloite. <sup>71</sup>Caimona Judas Iscariote  
 micorina ñaite. Judas micori Jesúna  
 gaitataiacadimie.

**Jesús amatiai naimiena  
 iñoñena rafue**

**7** <sup>1</sup>Jiairuido Galileamo ite nairaiamo  
 Jesús macarite. Judíuai illaicomini  
 naimiena meineiicana jira, Judeamo  
 jaiñede. <sup>2</sup>Jifocotiaíai railla rafue iaíre  
 ite. Judíuai ie rafue. <sup>3</sup>Ie jira Jesús  
 amatiai naimie mo lloite:

—O diga jaicabidino o finua rafuena  
 raise cioillena, beno fainonocaida,

Judeamo jai. <sup>4</sup>Bu ie mameci are soriacania, bainino maijirainina. Ie isoide. Siño rafuena o finoia, ailluena comini illa motomo iena fino.

<sup>5</sup>Jesús amatiaí naimiena iñoñena jira, iese raité. <sup>6</sup>Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. <sup>7</sup>Comini omoina enoiñedimaci. Naimaci finoca jearede rafuena cue llua jira, cuena jaca enoidimaci. <sup>8</sup>Jerusalémo rafuemo jai. Cue jaillirui nia riñena jira, nia jaiñeiticue. <sup>9</sup>—Iese llvano, Galileamo naimie fiebide.

<sup>10</sup>Naimie amatiaí rafuemo jailla mei, Jesúdi naimaci jinafona dama bainino jaide. <sup>11</sup>Nai rafuemo judíuai illaicomini Jesúna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

<sup>12</sup>Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifuate” raitimaci. <sup>13</sup>Judíuai illaicominina iciana comini jaciruillanona, anado siadoside. Jesúna marefodo buna ñaiñede.

#### **Sábadoruimo Jesús maijia raufe**

<sup>14</sup>Jifocotiaíai railla rafue atuedo fuitemo, Jesús Jusiñamui jofomo jaillano, llofuate. <sup>15</sup>Illaicomini naimie llofuiafona rajicaidimaci:

—¿Niese naimie abi uiñote? Eo rafuena uiñotimiemona jaca fueoñede —raitimaci.

<sup>16</sup>Jesús uai ote:

—Dama cuemona oñega cue llofuiafinodi. Cuena oretatimie ie.

<sup>17</sup>Jusiñamui jitaillacinona finoiacadimiedi ninomona cue llofuiafinona cue uana uiñoite. Jusiñamuimona cue uana uiñoite. Dama

cue comecimona cue oñenana jiai uiñoite. <sup>18</sup>Bu dama ie comecimona ie llofuiafinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Maraiñedicinona finoñede. <sup>19</sup>Moisés micori Jusiñamui uaina jaie llote; iadedi birui naie llogacinuaina nia raise iñoñedomoi. Iena raise iñnotomoidena, cuena niade meineiacañedomoi.

<sup>20</sup>Comini dinena uai ote:

—Nibai uairitaidio. ¿Bu ona meineiacadé?

<sup>21</sup>Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoí.

<sup>22</sup>Sábadoruimo jai maijicabidomoi.

Moisés micori iisaiaí abiaí diana omoimo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo iisana abi dellirui ia, detomoi. <sup>23</sup>Moisés micori llogacinona iñollena, sábadoruimo iisaiaína detomoi. Sábadoruimo iimana raise jillotaticuemo, ¿bue ñellena cue diga iciritomoi? <sup>24</sup>Cominimo jamai eruailanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

#### **Jesúna comini siadua rafue**

<sup>25</sup>Ie jira Jerusalémo itino coniniri siadotimaci:

—Illaicomini bimiena meineiacadimaci; <sup>26</sup>iadedi beno marefodo naimie llofuate.

Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. <sup>27</sup>Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

<sup>28</sup>Te jira Jesús Jusiñamui jofomo naimie llofuiano lloste:

—Cuenta uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai lloste. Naimiena uiñoñedomoi. <sup>29</sup>Naimiemona cue billa jira, naimiena uiñoticue. Cuenta oretate —lloste.

<sup>30</sup>Te jira illaicomini Jesúsna gaitaacadimaci; iadedi naimie fiодaille facaise nia riñena jira, buna naimiena gaitañede. <sup>31</sup>Nairui ailluena comini naimie uaina ñnotimaci. Raitimaci:

—Cai Jilloitaraima bia, ¿niese naimiedi bimie baifemo jiaie rafuena finoite?

#### Jesúna gaitaiacana rafue

<sup>32</sup>Fariseuaidi comini iese ñaiana cacajano, Jesúsna gaitallena, Jusiñamui diga nanoca ñairainidi ailluena policiana orede. <sup>33</sup>Te jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue.

<sup>34</sup>Cuenta jenoitomoi; iadedi cuena baiñeitomoi. Cue dine binitomoi.

<sup>35</sup>Te jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judfuaiñedinona llofuellena, jiaie eniruemo cai comini dine ñibai jaite. <sup>36</sup>¿Ñiese naimie raite: “Cuenta jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

#### Jesúdi Jusiñamui Joreñaona ñaia rafue

<sup>37</sup>Jifocotiaiaia raila rafue fuillaruiamo, ua rafue ie nairuimo, Jusiñamui jofomo itinomo Jesús ado lloste:

—Bu jiroacania, cue dine bi.

<sup>38</sup>Jusiñamui facaina lloraini micoriai

jaie cuela: “Naimiena ñnotimie comecimo jaca itatate jinui isoi iite, torafomona jinui tonooilla isoi”.

<sup>39</sup>Jesúdi iese lloste; ia Jusiñamui Joreñaona ñaite. Jesúsna ñnotinomo Jusiñamuidi ie Joreñaona ico illena ñaite. Jesús nia fiодañena jira, iena nia iñega.

#### Comini Jesúsna dane siadua rafue

<sup>40</sup>Jesús lluana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñena, naimie biite” llotimaci. Bimiedi naimie.

<sup>41</sup>Jiaino raitimaci:

—Naimiedi cai Jilloitaraima.

Naimiedi Cristo.

Jiaino raitimaci:

—Cai Jilloitaraima Galileamona biñeite. <sup>42</sup>Jusiñamui facaina lloraima micori cuela: “Cai Jilloitaraimadi David micori jito. Belémo David micori illanomo jeicille”.

<sup>43</sup>Te jira daje isoi naimiemo comeciaina facañedimaci. <sup>44</sup>Jiaino naimiena gaitaacadimaci; iadedi buna naimiena jetañede.

#### Judúuai illaicomini Jesúsna iñoñena rafue

<sup>45</sup>Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúsna atiñedomoi?

<sup>46</sup>Policías dinena ua ote:

—Naimie llofuiá isoi jaca buna llofueñede. Iena jacinailanona, naimiena atiñedicai.

<sup>47</sup>Fariseuai dane llotimaci:

—Cominina jifuiá isoi, omoína jiai jifuate. <sup>48</sup>Cai illaicomini dinena naimiena jaca iñoñedicai. Moisés micori llogacinodo raise jaidicai; <sup>49</sup>ia Jesús llofuiana cacadino Moisés micori

llogacinuaido jaca raise jaiñedimaci. Ie jira jaca faifitimacisa.

<sup>50</sup>Naie illaicominimona Nicodemo raillamie ite. Naimie naiona Jesús dine navui jaide. Fariseo imie. <sup>51</sup>Jesúna riiduanona, naimie lloste:

—Cai einamací llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

<sup>52</sup>Nicodemomo llotimaci:  
—Galileamona bitino isoi ñaitio. Naimie llofuegamiena nibai jai jaiacadio. Jaie cuegafuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

<sup>53</sup>Ie meinoconi damierie imaci jofomo jaidimaci.

**Ie iniñede iima diga riñodi  
rafuetailla ie rafue**

**8** <sup>1</sup>Naie facaise Jesúdi Olivos railla anedumo jaide. <sup>2</sup>Ie areruido jiritramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofue. <sup>3</sup>Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidadimaci. Comini illa uicomo atiano, <sup>4</sup>Jesúmo llotimaci:

—Llofueraima, biñaiño ie iniñede iima diga eidaticai. <sup>5</sup>Moisés micori jaiie cuega: “Bie isoidiñaiñodi notici diga fairinoga, meinellena”. ¿Niese naiñaiñona o raitio?

<sup>6</sup>Naimiena facacillena, naimie raise uai oñenia, naimiena llogidollena, iese

jicanotimaci. Iena cacajano, Jesús ana jitadacaida, eniruemo ie onocai diga cuete. <sup>7</sup>Naimiemo diga icaiño jica-jicanuano, naimie naidacaida, naimacimo lloste:

—Omoimona jeacino iñedimie naiñaiñomo nano noficina fairino.

<sup>8</sup>Dane ana jitadacaida, eniruemo dane cuete. <sup>9</sup>Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conrueni jino jaidimaci. Nana comini tuua mei, nainomo Jesús fiebide, naie riño diga ñaillena. <sup>10</sup>Eruaillano naiñaiñomo jicanote:

—¿Ni nai o llogidotino?

<sup>11</sup>Naiñaiño uai ote:

—Jaca iñedimaci. Cuenajai llogidoiacaiñedimaci.

Jesús uai ote:

—Jiaí ona duere finoñeiticue. Mai jai. Jeacino dane finoñoeno.

**Jesúdi comini  
comeciái lligaiñua rafue**

<sup>12</sup>Jesúdi cominina dane llofuianona, raite:

—Jeacino oni jaillena, comini comeciaina lligaiñoticue. Cuenai iñotimie jiritredinomo jaca iñeite. Jeacino anamo jai iñedimie Jusiñamui diga ico jaca iite.

<sup>13</sup>Fariseuai dinena uai otimaci:

—Dama o abina ñaitio. Ie jirari uanaicinsona lloñedio.

<sup>14</sup>Jesús uai ote:

—Dama cue abina lloticue; iadedi uanaicinsona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. <sup>15</sup>Abi raise uiñoñoeno cuena jeare ñaitomoi. Iese omoina ñaiñedicue; <sup>16</sup>iadedi omoina cue ñaia, uanaicinsona lloticue. Dama cue uaina



omoina lloñedicue. Cuena oretatimie omoina jiai llote. <sup>17</sup>Moisés micori iena jiai jaie cuega: “Menamie daje isoi lloia, naie iaimaiái llucacínodi omoi iinua” cuega. <sup>18</sup>Cue facaina lloiena, menamie jai ite. Cue facaina lloticue. Cue Moo cue facaina jiai llote.

<sup>19</sup>Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoina, cue Moona jiai uiñotomoi.

<sup>20</sup>Jusiñamui jofomo ucube eenoracomo bicinona siadotimaci. Jesús fiódaille facaise nia riñena jira, jaca buna naimiena gaitañede.

**Jesúna comini iñoñenia, naie  
jeacino diga fiódaille rafue**

<sup>21</sup>Naimacimo Jesús dane llote:

—¿Ico oni jaiticue. Cuena jenoitomoi; iadedi cuena baiñeitomoi. Na omoimo jeacino nia itemo, fiódaitomoi. Cue jaillinomo jainitomoi.

<sup>22</sup>Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús railla jira, iese siadotimaci.

<sup>23</sup>Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie díbeimo iñedomoi; ia naimie díbeimo iticue. <sup>24</sup>Cue Jusiñamui Jitonana omoi iñoñena jira, na omoi jeacino diga fiódaitomoi.

<sup>25</sup>Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoina raicabiticue.

<sup>26</sup>Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi

omoimo cuena oretatimie uaina dama lloticue. Nai uaidi uanaicino —llote.

<sup>27</sup>Naimiedi ie Moo Jusiñamuina llote; iadedi cacaiñedimaci. <sup>28</sup>Ie jira Jesús llote:

—Cuena omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofuia uaido llocabiticue. <sup>29</sup>Cuena oretatimie cue diga ite. Naimie jitaille rafuena cue finua jira, cuena fañonocañede.

<sup>30</sup>Iese Jesús llotemo, diga illaicomini naimie uaina como iñoiacadimaci.

**Comini Taife anamo illa rafue**

<sup>31</sup>Jesúdi naimie uaina como iñoiacadinomo llote:

—Cue lluaña iñocana omoi jaia, cue ua cominidomoi. <sup>32</sup>Uanaicinona uiñoitomoi. Ie mei jiaimie anamo dane iñeitomoi.

<sup>33</sup>Uai otimaci:

—Abraham micori ie uruiaidicai. Jiaimie anamo jaca iñedicai. ¿Bue ñellena llotio: “Jiaimie anamo iñeitomoi?”

<sup>34</sup>Jesúdi uai ote:

—Uanai lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ñaiticue. <sup>35</sup>Jiaie rafuemo iena lloticue. Ie patrón anamo itimiemo ie patrón rafuedi duiñede; iadedi naie patrón jitoimo ie rafuedi duide. <sup>36</sup>Ie isoide. Jusiñamui Jitona cue illamona, naimie rafuemo duidicue. Ie jira omoimo cue lloia, omoi jeacino anamo ua iñeitomoi. <sup>37</sup>Abraham micori ie uruiaidomoi. Iena uiñoticue; iadedi cue lluaña omoi raise iñoñena jira, cuena meineiacadomoi. <sup>38</sup>Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

<sup>39</sup>Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoí. Abraham micori uruiainedomoí. Ie jira Abraham micori finoca rafue isoi finoñedomoí. <sup>40</sup>Uanai cue llua jira, cuena meineiacadomoí; iadedi Abraham micori iese finoacaiñede. Cue lluacino Jusiñamuimona oticue.

<sup>41</sup>Jusiñamui uruiái finoca rafuena finoñedomoí; iadedi omoi moo finoca rafuena finocabidomoí.

Uai otimaci:

—Jamai nairai ie uruiainedicai. Cai Moodi Jusiñamui.

<sup>42</sup>Jesús dane llote:

—Jusiñamuidi omoi moodena, cuena isiruitomoí, naimiemona cue billa jira. Cue jitaila jira, biñedicue; iadedi cuena oretate. <sup>43</sup>¿Bue ñellena cue lluaa cacaiñedomoí? Cacareirainidomoí.

<sup>44</sup>Omoi moodi Taifena jira, cue lluaa iñoñedomoí. Naimie jitaila rafuena finoacacabidomoí. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucacabidomoí. Naimie isoidomoí. <sup>45</sup>Uanai cue llua jira, cuena iñoñedomoí. <sup>46</sup>¿Nie isoide jeacino finodicue? Cueno llono. Uanai cue llia, ¿bue ñellena cuena iñoñedomoí?

<sup>47</sup>Jusiñamuina mooredimiedi Jusiñamui uaina cacade. Jusiñamui uruiainedomoí. Ie jira cue lluaa cacaiñedomoí.

<sup>48</sup>Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

<sup>49</sup>Jesús uai ote:

—Janaba illamieñedicue. Cue finoca rafuemona cue Moona iobitadicue;

iadedi iese cuena omoi ñaiamona cuena iobitañedomoí. <sup>50</sup>Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacinona omoi fecañenia, cue Moo omoina duere finoite; <sup>51</sup>ia bu cue lluaa ua iñoia, jaca ua fioidaiñeite.

<sup>52</sup>Naie illaicomini dinena uai otimaci:

—Janaba illamiediona jai uiñoticai.

Abraham micori jaie fioidaite.

Jusiñamuina lloraini micoriai jiai jaie fioidaitimaci; iadedi: “Bu cue lluaa iñoiadedi, fioidaiñeite” raitio. <sup>53</sup>Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiedia?

<sup>54</sup>Jesúdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoí; <sup>55</sup>iadedi naimiena uiñoñedomoí. Naimiena uiñoticue.

“Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jiai iñoticue. <sup>56</sup>Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

<sup>57</sup>Illaicomini dinena uai otimaci:

—Odi cincuenta años nia iñedio.

¿Niese Abraham micorina ciodio?

<sup>58</sup>Jesús uai ote:

—Abraham micori nia iñena facaiseconi jaca iticue.

<sup>59</sup>Iena cacajanona, naimie fairinollena, naie illaicomini nificina llinotimaci; iadedi Jesús reirillanona, Jusiñamui jofomona oni jaide.

Jesús uisinidimiena jillotaja rafue

**9** <sup>1</sup>Jiairuido ie llofueoicaiganodicai diga Jesús macaria, uisinidimiena ciodo. Iese nanomona jaca naimiedi jeiciga. <sup>2</sup>Jesúmo jicanoticaí:

—Llofueraíma, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

<sup>3</sup>Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuñede. Jusiñamui uai siñonana comini uiñollena, iese jeiciga. <sup>4</sup>Nia userena jira, cuena oretatimie ie jitailla rafuena finoacadicaí. Raire jitirenite. Ie mei bu jaca maijinite. <sup>5</sup>Eniruego cue nia ia, comini comeciaina lligaiñoticue. —Iese Jesús llote; iadedi jiaie rafuena ñaite. Naimie nia fiodañenia, Jusiñamui rafuena llocana naimie jaillana ñaite. Ie fiodaillirui jai iaie iacanana ñaite. Comeciaina lligaiñuana llote, jeacino oni jaillena.

<sup>6</sup>Iena lluanona enirueno tuajano, enirue idiai finuanono, uisinidimie uisina naie enirue diga riginote. <sup>7</sup>Raite:

—Siloé railla joraibimo mai noisai —raite. Siloé oni dobañuamona: “Oretarabi”.

Ie jira naimie noisaide. Uisi jai ciodigo, abido bite. <sup>8</sup>Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

<sup>9</sup>Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodigo.

<sup>10</sup>Naimiemo jicanotimaci:

—¿Niese jai birui ciodigo?

<sup>11</sup>Uai ote:

—Jesús raillamie enirue idiai finuano, cue uisina riginote. Cuemo llote: “Siloé

railla joraibimo noisai”. Ie jira noisaidicue. Jai ciodigo.

<sup>12</sup>Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

### **Comini uisinidimie jai jilluana siadua rafue**

<sup>13</sup>Navui uisinidimie jai jillua mei, fariseuai dine comini naimiena uitimaci.

<sup>14</sup>Sábadoruimo Jesúsdi naimiena jillotaja jira, <sup>15</sup>fariseuai naimiemo jicanotimaci:

—¿Niesenamona jai ciodigo?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodigo.

<sup>16</sup>Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede. Jiaino raitimaci:

—¿Niese jearede ra finuidimiedi uisinidimiena jillotate? —Ie jira daje isoi comeciaina facañedimaci.

<sup>17</sup>Ie jira navui uisinidimiemo dane jicanotimaci:

—Naimie ona jillotaja jira, ¿niese odi Jesúsna raitio?

Uai ote:

—Naimiedi Jusiñamui uai lloiraíma.

<sup>18</sup>Naimie moo, naimie ei iaímaíaimo nia jicanoñenia, judíuai illaicomini nai iima jaca cioñenano iinosiñede. Ie jira iaímaíaina uaiduanona, <sup>19</sup>jicanotimaci:

—¿Bimiedi omico jito? ¿Naimie jaca uisinino jeiciga?

<sup>20</sup>Uai otiaímaíai:

—Jii, bimie coco jito. Jaca uisinino jeiciga. Iena uiñoticoco. <sup>21</sup>Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaíai.

<sup>22</sup>Bie rafue nia suiñenia, judíuui illaicomini navui llotimaci: “Jesúdi cai Jilloitaraima bu lloia, cai ofiracomona naimiena fo billana rairuíticai”. Iena jaciruillanona, <sup>23</sup>lloitiiaimiai: “Naimie jai eimiesa. Naimiemo jicano”. <sup>24</sup>Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecaño. Naimie jearede rafuena finouidimiena uiñoticai.

<sup>25</sup>Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirañidicue. Birui jai ciodicue. Iena uiñoticue.

<sup>26</sup>Jicanotimaci:

—¿Niesede ra diga finuamona odi uisina ciodio? ¿Niese ona jillotate?

<sup>27</sup>Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

<sup>28</sup>Riire uai otimaci:

—Naimie ie llofuegamiedio. Caidi Moisés micori ie llofueganodicai.

<sup>29</sup>Jusiñamui Moisés micorimo jaie lluana uiñoticai; iadedi bimiena uiñoñedicai. Naimie ninena billana jiai uiñoñedicai.

<sup>30</sup>Nai iima uai ote:

—Jai, naimie ninena billana uiñoñedomoi; iadedi cuena jillotate. <sup>31</sup>Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cascade. Ie jitailla rafuena finodimie ñaia uaina cascade. Naie isoidino siño rafuena finuana uiñoticai.

<sup>32</sup>Enirue finua facaise mona jaca buna uisinino jeicigamiena jilloitañede.

<sup>33</sup>Jesúdi Jusiñamuimona biñedimiedena, jaca buena finonide.

<sup>34</sup>Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

**Jesús uisinidimie diga ñaia rafue**

<sup>35</sup>Uisinidimiena jino dotajana fidianona, Jesús naimiena jenode. Baillano, jicanote:

—¿Omoi cominina Jilloitaraimana iñotio?

<sup>36</sup>Uai ote:

—¿Bumai naimie? Cuemo llono, naimiena cue iinollena.

<sup>37</sup>Jesús uai ote:

—Naimiena ciodio. O diga ñaite. Cue.

<sup>38</sup>Caiñici ifodo rainadajanona, iobillacinona fecallena, uai ote:

—Nama, jai o uaina iñoticue.

<sup>39</sup>Jesús uai ote:

—Uisinidino cioitallena, eniruemio biticue. Jai uisina ciodino uisina cioitañellena biticue. —Iese Jesús raite; ia naimaci comeaiña ñaite. Jesús “Jai marañedicai” raitinona jillotajaibite. Jesús “Jai maredicai” raitinomo ite jeacino naimaci uiñollena bite.

<sup>40</sup>Naimie ecimo ite fariseuai iena cacajano, jicanotimaci:

—¿Uisinidomoi caina raitio?

<sup>41</sup>Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodicai” omoi raila jira, omoimo ite jeacino omoi muidona.

Iese raite; ia naimaci comeaiña ñaite. Jeacino naimacimo illana naimaci uiñoiacaiñena jira, iese ñaite. Naimaci jeacino oni dotajana jitañedimaci.

**Toica llaudaiai sedaraima rafue**

**10**<sup>1-2</sup>Jesús dane llofue: —Cue rafuena omoi raise uiñollena, toica llaudaiaia ñaiticue. Llaudaiaia jino uicabilla isoi, llaigafomo

nasedo fo jaidimiedi naie llaudaiaí sedaraima; ia jinofebei dinena bitimiedi fiiriraima. <sup>3</sup>Llaigafó llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciaído uaiduamona, llaigafomona jino bitimaci. <sup>4</sup>Nana ie llaudaiaí jino bia, naimacina ifode. Naimie uaina uiñuanona, naimiena racadimaci. <sup>5</sup>Naimaci uiñoñegamiēna racañedimaci; iadedi naimie uaina naimaci uiñoñena jira, naimiemona oni aisidimaci.

<sup>6</sup>Bie isoidicinona Jesús llofuate; iadedi naie comini iēna cacañedimaci. <sup>7</sup>Ie jira Jesús dane llofuate:

—Llaigafó ie nase isoidicue.

<sup>8</sup>Damierie fiirirainina bitimaci. Ie jira llaudaiaí naimaci uaina cacañedimaci.

—Iese Jesús llofuate; ia naimiena iñotinona ñaite. Naimiena abi caitadinona ñaite. Naimie iñotino naimiena abi caitadino llogacinomo cacarefiñena ñaite. <sup>9</sup>Nia llofuate:

—Llaigafó isoidicue. Bu cue nasedo fo bia, jilloite. Llaudaiaí isoi fo biite. Jino jaite. Mare guille baite isoite. —Iese llofuate; ia naimiena iñotino marena illana ñaite. Naimiemona naimaci jitailla rafuena uana ñaite. <sup>10</sup>Nia llofuate:

—Llaudaiaina fiillena, meinellena, faifillena, fiiriraima bite; iadedi cominina jaca raise itatallena, biticue.

<sup>11</sup>Llaudaiaí marena sedaraimadicue. Mare sedaraimadi ie toñiaí facaina riiduanona ie abina faifite. <sup>12</sup>Janallari bia, llaudaiaí naimie ieñena jira, jamai maijidimiedi, llaudaiaina fañonocaillano, ecimona aísede. Llaudaiaina janallari gaitaacanamona, llaudaiaí tuudimaci. <sup>13</sup>Jamai ucube oiacanano, isiruiñenano, jamai maijidimie aísede. <sup>14</sup>Iese iñedicue. Mare sedaraimadicue. Cue llaudaiaina

uiñoticue. <sup>15</sup>Cue Moo diga conimana coco uiñua isoi, naimaci cuena jiaí uiñotimaci. Cue llaudaiaí facaina fioidaiticue. —Iese Jesús llofuate; ia naimiena iñotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaí fioidaiacade. <sup>16</sup>Nia llofuate: —Jiaie llaigafomo jiaie llaudaiaí cuemo ite. Naimacina jiaí atiacadicue. Cue uaina cacaitimaci. Ie mei danomo nana cue llaudaiaí iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena iñoitinona ñaite. Dajena naimacina sedajana ñaite.

#### Jesús fioidaille rafue

<sup>17</sup>Jesús nia llofuate:

—Cue jai fioidaiacanamona, cue Moo cuena isiruite. Fioidaillamona dane jilloiticue. <sup>18</sup>Cue jitañenia, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruiimo fioidaiticue. Cuemo cue Moo siño uaidi jai illa jira, dane jilloiticue.

<sup>19</sup>Jesús iese llofuia jira, judfuai illaicominidi daje isoi comeciaina facañedimaci. <sup>20</sup>Jiainodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

<sup>21</sup>Jiaino raitimaci:

—Bie isoidicinona Janaba illamie llofueñede. Janaba illamie uisinidimiena jillotanide.

#### Jesús ie Moo diga daje isoi comeci lloilla rafue

<sup>22</sup>Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite. <sup>23</sup>Salomón micori finotaga jofo abi ibirimo Jesús macarite. <sup>24</sup>Naie facaise judfuai illaicomini naimie ñe bitimaci. Jicanotimaci:

—¿Niruido caimo ona lloitio? Odi cai Jilloitaraïmania, caimo marefodo lloño.

<sup>25</sup>Jesús uai ote:

—Omoïmo jai lloticue; iadedi iñoñedomoi. Cue Moo mamecido cue finoca rafuemona cuena uiñotomoi.

<sup>26</sup>Cue toïca llaudaïaïmo omoi jainaïaïñena jira, cuena iñoñedomoi.

<sup>27</sup>Cue toïca llaudaïai cue uaina cacadimaci. Naimacina uiñoticue. Cuena racadimaci. <sup>28</sup>Naimaci jaca itataticue. Jaca abina faifñeitimaci. Cue anamona jaca budi naimacina bairoñeite. <sup>29</sup>Cue Moo naimacina cuemo fecade. Naimacidi jiaïno baïfemo faitimaci. Naimiemona jaca budi naimacina baiронide. <sup>30</sup>Cue Moo diga daje isoi comecina lloidicoco. —Iese llote; ia naimiena iñotinona ñaite. Naie illaicomini naimiemo jainaïaïñena jira, naimiena iñoñedimaci. Iena Jesús ñaite.

<sup>31</sup>Jesús llofuiana cacajano, naie illaicomini noficina llinotimaci, naimiena meinellena. <sup>32</sup>Iena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

<sup>33</sup>Uai otimaci:

—Mare rafuena o finua muidona, ona meineñeiticai. Jamai iïmadio. “Jusiñamuidicue” o railla jira, ona meineñeiticai. Jusiñamui Joreña jiaï jeare ñaitio.

<sup>34-36</sup>Jesús dinena uai ote:

—Jaie ciegafuïaïna jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuïllaïdomoi”. Jusiñamui ie uaina cacadinomo jaie iese lloïade, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreña jeare ñaitio”

raitomoi. <sup>37</sup>Cue Moo isoi cue finoñenia, cuena iñoñeno; <sup>38</sup>iadedi cuena omoi iñoïacaiñenia, cue Moo isoi cue finoïa, naie rafuena iño. Iemeï cue Moomo cue jainaïaïllana uiñoïtomoi. Cuemo cue Moo jainaïaïllana jiaï uiñoïtomoi.

<sup>39</sup>Iena cacajano, naimiena dane gaitaacadimaci; iadedi naimacimona jillode.

<sup>40</sup>Ie mei Jesús Jordán railla ille ruica ðibeïmo jaide. Nainomo Juan micori cominina nano bautizade. Nainomo rillanona, nainomo Jesús fiebide.

<sup>41</sup>Aïlluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúna lluacïnodi uanaïcino.

<sup>42</sup>Nainomo aïlluena cominidi Jesús naimaci Jilloitaraïmana iñotimaci.

#### Betaniamo Jesús abido jailla rafue

**11** <sup>1</sup>Naie facaise Betaniamo Lázaro raïllamiedi duide. Naimie miriñodi Marta, María iaïñuai. <sup>2</sup>Naie Maríadi jairuido Jesús eïllimo caïmare soride rana totade. Ie mei naiñaiño ie ifotie diga naimie eïllina safenaïllena dote. <sup>3</sup>Naie iaïñuai Jesús dine uaina orediaïñuai, naimie billena. Naimie jibuisaïbillena llotatatiïñuai:

—Nama, o isiruïgamie duide —llotatatiïñuai.

<sup>4</sup>Jesús naie rafuena fidiano, llote:

—Jamai fiodaïllena naimie ðuñede.

Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodïo” cuena raitimaci.

<sup>5</sup>Jesúdi Lázaronna isiruïte. Ie miriño iaïñuaina jiaï isiruïte; <sup>6</sup>iadedi Lázaro duïllana Jesús fidiano, naimie dine jaiñede. Naimie illanomo menarui nia fiebide. <sup>7</sup>Ie mei ie llofueoïcaïganodicaïmo llote:

—Judeamo abido dane mai cai jailli.

<sup>8</sup>Uai oticai:

—Llofueraima, judfúuai illaicomini birui nofcina ona fairinoiacadimaci. ¿Niese naimaci dine dane jaitio?

<sup>9</sup>Uai ote:

—Nagarui userede. Userenia bu macaria, raise ciua jira, eicaitañede; <sup>10</sup>iadedi bu naiona macaria, raise cioñena jira, eicaitaide. —Iese llofuede; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

<sup>11</sup>Dane llote:

—Lázaro jai inide; iadedi naimiena casitallena, jaiticue.

<sup>12</sup>Uai oticai:

—Nama, naimie jamai iniia, nia dama casite.

<sup>13</sup>Naimie jafaici uanona iniamo comeciaina facadica; iadedi Jesús naima lloñede. Lázaro fiodaillana ñaite.

<sup>14</sup>Ie jira Jesús caimo marefodo llote:

—Naimie jai fiodaite. <sup>15</sup>Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

<sup>16</sup>Caïmona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimó. Naimiedi gorasa.

**Jesús Marta diga ñaia rafue**

<sup>17</sup>Betaniamo cai ria, Lázaro raiafomo jai nagaamagarui illana fididicai.

<sup>18</sup>Jerusalémona Betaniamo tres kilómetros dinori illa jira, <sup>19</sup>diga judfúuai illaicomini eedollena, Marta iaiñuui María dine bitimaci. <sup>20</sup>Jesús billana Marta fidiano, cai dine naisomo bite; iadedi jofomo María fiebide. <sup>21</sup>Jesúmo Marta llote:

—Nama, o bene itiona, cue iio fiodañede; <sup>22</sup>iadedi Jusiñamuimo

buena o jicaia, naimie iena finoite. Iena uiñoticue.

<sup>23</sup>Jesús dinena uai ote:

—O iio abido jilloite.

<sup>24</sup>Naiñaiño uai ote:

—Nana comini jilloilliruimo naimie jia; jilloite. Iena uiñoticue.

<sup>25</sup>Jesús uai ote:

—Fiodaillamona comini abiaina Jilloitaraimadicue. Jusiñamui diga jaca illena, cominina itataraimadicue. Bu cuena iinuanona, fiodaiadedi, iemona ico jilloite.

<sup>26</sup>Cuena inotimiena Jusiñamui illanomo jaca illena itataitcue. ¿Iena inotio?

<sup>27</sup>Naiñaiño uai ote:

—Jii, Nama; odi cai Jilloitaraimadio. Odi Jusiñamui Jitodio. Jusiñamui dinena o billamo jaie ocuridicai.

<sup>28</sup>Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

<sup>29</sup>Iena cacajano, raire cai dine María bite. <sup>30</sup>Marta diga ie ñaianomo Betania ecimo Jesús nia ite. <sup>31</sup>Jesús dine María

nia jaiñenia, judfúuai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. <sup>32</sup>María Jesús dine rillano, naimiena duenaillano, cañici ifodo rainadacaida, llote:

—Nama, bene itiona, niadedi cue iiodi fiodañede.

**Jesús Lázaron a jillotaja rafue**

<sup>33</sup>María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

<sup>34</sup>Jicanote:

—¿Ninomo Lázaron a raitomoi?

Uai otimaci:

—Nama, mai jibuisaibi.

<sup>35</sup>Lázaron a duenaillanona, Jesús eede.

<sup>36</sup>Iena ciuanona, judfúuai illaicomini dinena llotimaci:

—Ero. Naimiena eo isiruite.

<sup>37</sup>Jiaïno raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fiodaïñenia?

<sup>38</sup>Iena cacajanona, ie siño uai finuana naimaci nia raise iinosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. <sup>39</sup>Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede.

Nagaamagarui raiafomo jai ite.

<sup>40</sup>Jesús uai ote:

—Cuen a o iñoia, Jusiñamui uai siñonana uiñoitio.

<sup>41</sup>Iemona cominidi noficina oni ñuitadimaci. Jesús monamo eruailano, llote:

—Moo, cue uaina o cacaja jira, iobidicue. <sup>42</sup>Jaca cuena cacadio. Iena uiñoticue; iadedi cue diga bene itino illa muidona, iese ado lloticue. Cuen a o oretajana naimaci iinollena, o diga ado ñaiticue.

<sup>43</sup>Ie mei eo ado llote:

—Lázaro, jino bi.

<sup>44</sup>Nai fiodaitimie nia naimie abi nana ferinua ra diga jino bite. Jesúdi cominimo llote:

—Naimie abi ferinua oni suiño. —Ie jira suiñodimaci.

<sup>45</sup>Ie muidona María diga bitinomona ailluena comini Jesúna iñotimaci. Naimie finoca rafuena cianona, iñotimaci.

**Jesúna meinellena, illaicomini  
comeciaina facaja rafue**

(Mt. 26.1-5; Mr. 14.1-2; Lc. 22.1-2)

<sup>46</sup>Jesúna iñoñedinomona damierie Jesús finoca rafuena fariseuai dne lluidimaci. <sup>47</sup>Ie jira Jusiñamui diga

nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiiticaí? Diga siño rafuena ua finocabide. <sup>48</sup>Naimiena niese cai nibañenia, nana comini naimiena iñoitimaci. Nana comini naimie díbeimo jaia, naimaci illaimana naimie jaillana jítaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaí fuidoitimaci. Iena jitañedicai.

<sup>49</sup>Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi.

<sup>50</sup>Iese cai nairaimo suiñellena, damie cai nairai facaina fiodaítene, mare. Iena níbaí nia raise uiñoñedomoi.

<sup>51</sup>Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

<sup>52</sup>Cai comini facaina dama fiodaíñede; iadedi nana Jusiñamuina iñoitina facaina fiodaite. Diga nairaiaimo itimaci; iadedi naimiemo dajena nana naimaci duillena, naimie fiodaite.

<sup>53</sup>Caifás llua naimaci cacajamona, judíuai illaicomini comeciaina nia facadimaci, naimiena meinellena.

<sup>54</sup>Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dne ridicai. Nainomo diga irui iticai. <sup>55</sup>Pascua railla rafue iaie iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamacimoi llua isoi finodimaci. <sup>56-57</sup>Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.



Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Ñiese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini llua fidiano, naimie biñeite.

**Betaniamo Lázaro jofomo**

**Jesús guilla rafue**

*(Mt. 26.6-13; Mr. 14.3-9)*

**12**<sup>1</sup>Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron fiodaillamona navui jillotate. <sup>2</sup>Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. <sup>3</sup>Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. <sup>4</sup>Caimona Judas Iscariote micorina mameciredimie ite. Jesúna gaitataitimie. Llote:

<sup>5</sup>—¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. <sup>6</sup>Dueredinona naimie duenañede; iadedi naimie cai ucubena sedade. Naimiedi fiiriraíma. Naie ucubemona fiuilla jira, iese naimie llote.

<sup>7</sup>Jesús uai ote:

—Dama ite. Bie soride ra naiñaiño jai eenoga cue fiodaillirui iena. <sup>8</sup>Dueredino omoi diga jaca iitimaci; iadedi omoi diga jaca iñeiticue.

**Ailluena comini  
Lázaron ciua rafue**

<sup>9</sup>Lázaro jofomo Jesús illana ailluena cai illaicomini fidiano, bitimaci. Navui

fiodaillamona Lázaron Jesús jillotaja jira, Jesúna dama cioiacañedimaci; iadedi Lázaron jiai cioiacadimaci. <sup>10</sup>Ie jira Jusiñamui diga nanoca ñairainidi Lázaron jiai meinellemo comeciaina facadimaci. <sup>11</sup>Lázaro muidona ailluena judíuai illaicomini naimaci illa díbei faínonocaida, Jesúna iñotimaci.

**Jerusalémo illaíma isoi, Jesús  
marena jailla rafue**

*(Mt. 21.1-11; Mr. 11.1-11;*

*Lc. 19.28-40)*

<sup>12</sup>Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. <sup>13</sup>Raforona uanona, naimiena feiñollena, naimie uicomo jaidimaci. Ado cuiirisite:

—¿Cai Jilloitaraima billa! ¡Jusiñamui mamecido bitimie eo mare! ¡Cai Illaíma eo mare! —cuiirisite.

<sup>14</sup>Jesúdi ailli baiga burrito emododo jaide. Jusiñamui facaina lloraíma micori jaie llua isoi jaide. Jaie llote: <sup>15</sup>“Jerusalén imaci, jacinaiñeno. O Illaíma burrito emododo biite”. <sup>16</sup>Naie facaise bie rafuemo comeciaina facañedicai; iadedi Jesús jillua mei, bie rafuena comeciticai. <sup>17-18</sup>Lázaron Jesús jillotaja jira, ailluena comini Jesús dine jaidimaci. <sup>19</sup>Iena ciuano, fariseuai coniniri ñaitimaci:

—Jaca buena birui fiñoñedicai. Ailluena comini Jesús díbeimo jai jaidimaci.

**Judíuaiñedino Jesúna  
cioiacana rafue**

<sup>20</sup>Judíuaiñedino Jusiñamuina sedallena, pascua railla rafuemo jiai

bitimaci. <sup>21</sup>Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

<sup>22</sup>Felipe iena Andrémo lloste. Ie mei Jesúmo lluidiaímaiaí. <sup>23</sup>Jesús uai ote:

—Monamona biticue; ia jai cue fiódaille facaise ride. Comini cue uaidi siñonana uíñua facaise jai ride. <sup>24</sup>Jiaie rafuedo iena lloiticue. Ido rilla mei, naie ido sicoñenia, buena íñede; iadedi sicuamona, ailluena llisilladi iite. Ie isoide. Cue fiódaiñenia, jaca bu jillobiñeite. Cue fiódaillemona ailluena comini jillobitimaci. <sup>25</sup>Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite.

<sup>26</sup>Cuena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite. <sup>27</sup>Cue comeci jai rucaicuerite; iadedi, ¿niese raiticue? Raiñeiticue: “Moo, cue fiódaillemona cuena jillote”. Fiódaillema biticue. Ie jira raiticue: <sup>28</sup>“Moo, cominina o uai siñonana uíñota”.

Ieconí monamona Jusíñamui lloste:

—Jai iena finodicue. Dane iena fínoiticue.

<sup>29</sup>Jusíñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusíñamui jaienicí lloste.

<sup>30</sup>Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi. <sup>31</sup>Cuena uíñoñedino duere sefuilla facaise ja taineite. Taife anamo comini jai itimaci; ia Jusíñamui Taifena ja anafefitaite. <sup>32</sup>Cruzmo cue fiódaiia, naimacina jilloitallena, ailluena

cominina cue díbeimo itataiticue.

<sup>33</sup>—Naimie fiódaillema naimaci uíñoñllena, íese lloste.

<sup>34</sup>Naie comini uai otimaci:

—Jusíñamui facaina lloraini micoriaí jaie cuega: “Cai Jilloitaraima jaca fiódaiñeite”. ¿Niese raitio: “Jusíñamuimona biticue; ia fiódaiticue”?

<sup>35</sup>Jesús dane uai ote:

—Cue llofuia dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuíamo cacarei. Jitiredemo bu macaria, nai illana raise uíñoñede. Ie isoide. Jeacino anamo itinodi jitiredinomo itimaci isoidimaci. Uanaicínona uíñoñedimaci.

<sup>36</sup>Jeacino anamona omoi jilloillena, cue llofuia uaido omoi comeciaina birui lligaiñoticue. Cue uaina íino, cue cominina omoi jaillena.

Bie llua mei, Jesús oni jaillano, naimacimona reirite.

#### Comini Jesús uaina íinoñena rafue

<sup>37</sup>Jesús diga siño rafuena finode; iadedi ailluena comini: “Naimiedi cai Jilloitaraima” raillana nia íinosiñede.

<sup>38</sup>Iemona Isaías micori jaie cuegafuiai suide. Naimie jaie cuega:

Jusíñamui, cai lluacínona cacadimaci.

O siño uaido o finoca rafuena jiaí ciódimaci; iadedi íinoñedimaci.

<sup>39-40</sup> Isaías micori dane cuega:

Naimaci cioi raillano, Jusíñamui naimacina uisínidino isoi itatate.

Naimaci comeciaimana abina uíñoi raillano, naimaci comeciaina feitate.

Naimiena íinoi raillano, íese naimacina jai itatate.

Ie jira jai ínonidimaci. <sup>41</sup>Jusíñamui íe ebirede rafuena naimie ciuamona, Isaías micori iena lloste. Isaías micori Jesúna

llote. <sup>42</sup>Isaías micori iese llote; iadedi ailluena judúuai illaicomini Jesús uaina iinotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. <sup>43</sup>Comini naimacina iobitajana naimaci eo jitailla jira, dotajana jitaiñedimaci. Jusiñamuimo ite iobillacinona raise oiacañedimaci.

### Jesús ie Moona ñaia rafue

<sup>44</sup>Naie facaise Jesús eo ado llote:

—Cuenta iinotimie cuenta oretatimiena jiai jai iinote. <sup>45</sup>Cuenta ciotimie cuenta oretatimiena jiai ciode isoide. <sup>46</sup>Comini comeciaina lligaiñollena biticue. Ie muidona naga cuenta iinotimie jitreñinomo jai iñede. Jeacino anamo jai iñede. <sup>47</sup>Cue uaina cacajano iinoñedimiemo juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; <sup>48</sup>ia cuenta bu iñoñenia, cue uaina naimie iñoñenia, ja muidona faifite. Cue uaina naimie iñoñellemona, nana naimiena iñoñedino janafefilliruimo Jusiñamui naimiena ico duere finoite. Cuenta jitaiñedimie, cue uaina jitaiñedimie comini janafefilliruimo janafefite. <sup>49</sup>Dama cue comeci facaja uaido lloñedicue. Cue Moo cuenta oretaja muidona, cue Moo cuemo lloga uaido lloticue. <sup>50</sup>Cue Moo lloga uaidi naimie díbeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

### Jesúdi ie llofueoicaigano eilliaina jocua rafue

**13** <sup>1</sup>Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. <sup>2</sup>Jesúna gaitatallena, naie

facaise Taifedi Judas Iscariote micori comecina feidote. Judas micori Simón jito. <sup>3</sup>Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaiillena jiai uiñote. <sup>4</sup>Nairuido Jesús cai diga guite. Guilla meinoconi, Jesús a naidacaida ie abimo ite iniroina duiñode. Abi dora diga ie moillina ferinote. <sup>5</sup>Janorede nogomo jinuina totaja mei, cai eilliaina jocode. Safenaillena, ie dora diga dote. <sup>6</sup>Simón Pedro dine naimie ria, Pedro jicanote:

—Nama, ¿cue eillina jiai jocoitio?

<sup>7</sup>Jesús uai ote:

—Cue finoca rafuena birui uiñoñedio; iadedi jairuido uiñoitio.

<sup>8</sup>Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñoitio.

<sup>9</sup>Pedro uai ote:

—Nama, dama cue eillina jocoñoeno. O facaina raise cue illena, cue onolli, cue ifogi diga, jiai joco.

<sup>10</sup>Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

<sup>11</sup>Naimiena gaitataiacadimiena naimie uiñua jira, iese llote.

<sup>12</sup>Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. <sup>13</sup>Cuenta “Cai Nama” raicabitomoi. “Cai llofueraima” cuenta jiai raicabitomoi. Iese cuenta omoi raia, mare. Ie isoi iticue. <sup>14</sup>Omoi Namadicue. Omoi llofueraimadicue; iadedi omoi mullaima isoi iticuedena,

omoi eilliaina jai jocodicue. Omoi jamai bue isoidinomona, omoi eilliaina danirie jocua. <sup>15</sup>Cuemona fueo. Abi iedoñeno cue isoi omoi jai. Cue afemo iñedomoi. <sup>16</sup>Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno. <sup>17</sup>Bicino omoi uñuamona, iese omoi finoia, caimare iitomoi. <sup>18</sup>Nana omoina iese ñaiñedicue. Nana cue fetocanona uñiñoticue. David micori jaiie llore: “Cue diga guitinomona damie cuena enoidimie ite”. <sup>19</sup>Bie nia suiñenia, iena jai lloticue. Iena cuemo suilla mei, David micori llogacino raise iñiñotomoi. <sup>20</sup>Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

**Jesúdi ie gaitataitimiena llua rafue**

(Mt. 26.20-25; Mr. 14.17-21;  
Lc. 22.21-23)

<sup>21</sup>Jesús iese llua mei, ie comeci sunaite. Llore:

—Uanai lloticue. Omoimona damie cuena gaitataite.

<sup>22</sup>Caimona ¿nimie naimiena gaitataite? raillanona, comecina facajano, coninimo eroridicai. <sup>23</sup>Cuena Jesús eo gaia jira, Jesús abimo iticue.

<sup>24</sup>Cuena uaiduanona, Pedro cuemo llore:

—“¿Bu ona gaitataite?” Jesúmo jicano.

<sup>25</sup>Ie jira Jesúmo jicanoticue:

—Nama, ¿bu ona gaitataite?

<sup>26</sup>Jesús uai ote:

—Bie llomeniconna mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

<sup>27</sup>Llomeniconna guilla meinoconi, Taife

anamo Judas micori illamona, Taife naimie comecina feidote. Jesús naimiemo llore:

—O finoacaga rana raire fino.

<sup>28</sup>Jesús Judas micorimo llua raise uñiñedicai. <sup>29</sup>Judas micori ucubena sedaja jira, jiaino comecina facade: “Cai jitaille guille ibaraisai’ Jesús naimiemo llore”. Iese lloñenia, “Janore ucube dueredinomo feca’ nibai naimiemo llore”. <sup>30</sup>Guilla mei, Judas micori jino jaide. Naie facaise jai jitireficaide.

**Jesús ie fiodaillena ñaia rafue**

<sup>31</sup>Judas micori jailla mei, Jesús llore:

—Jusiñamuimona billanona, iimana jaidicue; ia cue fiodaillie facaise jai ride. Cue fiodaillimona cominidi Jusiñamui uai siñonana uñiñotimaci. <sup>32</sup>Iemona Jusiñamui uai siñonana comini uñiñoia, Jusiñamuidi cominina cue siño Jitona jiai uñiñotaite. Iese ja finoite. <sup>33</sup>Cue comini, dallu omoi diga bene iticue. Jaiticue. Cue diga iacanitomoi. Judfui illaicominimo navui cue llua isoi, omoimo ja lloticue. Cue jaillinomo nia jaiñeitomoi. <sup>34</sup>Ie jira jiaie rafuena omoimo ja lloticue. Omoina cue isiruilla isoi, coninina omoi isirui. <sup>35</sup>Coninina omoi isruillamona, jiaie cominidi cue cominidomoina uñiñotimaci.

**Pedro Jesús diga ñaia rafue**

(Mt. 26.31-35; Mr. 14.27-31;  
Lc. 22.31-34)

<sup>36</sup>Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio.

Jiairuido jaitio.

<sup>37</sup>Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiciticue.

<sup>38</sup>Jesús dinena uai ote:

—Cue facaina fiodiacadio. Uanai omo lloticue. Nia monañenia, iitava nia ñañenia, dacaiño amani cuena janoitiosa.

#### Jesús ie Moo dinomo rille rafue

**14** <sup>1</sup>Jesús ie llofueoicaiganodicaina nia llofuate:

—Rucacueriño uri i. Jusiñamuina iñocana jai. Cuena jiai iñocana jai. <sup>2</sup>Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. <sup>3</sup>Fuiduanona, dane abido biiticue. Omoína cue dine uillena, cue dine omoi illena, biiticue. <sup>4</sup>Cue jaillinona birui uiñotomoi. Nainomo omoi rillena jiai uiñotomoi.

<sup>5</sup>Tomás uai ote:

—Nama, o jaillinona uiñoñedicaí. ¿Niése nainomo riiticaí?

<sup>6</sup>Jesús uai ote:

—Omoi naiso isoidicue. Uanaicinona lloticue. Cue Moo díbeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena iño. <sup>7</sup>Cuena uiñotomoina, cue Moona jiai uiñotomoi. Biruidemona naimiena uiñotomoi. Naimiena jai ciodomoi.

<sup>8</sup>Felipe uai ote:

—Nama, o Moona caimo acata. Iemo jai macaibaite.

<sup>9</sup>Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciodimie cue Moona jiai jai ciode isoide. ¿Niése llotio: “O Moona caimo acata”? Cue Moona jai ciodio isoidio. <sup>10</sup>Cue Moo diga daajedicoco. Iena nia iñoñedio. Cue lluađi cue Moo uai. Cue lluađi cue comeđi iuañede. Cue motodo naimie maijide. <sup>11</sup>Cue Moo diga daajedicocona iño. Cue uaina omoi iñoñenia, siño rafuena cue finua jira, cuena iño.

#### Jesús ie Moo Joreñoña llua rafue

<sup>12</sup>Jesús nia llofuate:

—Uanai lloticue. Cuena omoi iñoia, cue finoca rafuena jiai finoitomoi. Cue Moo dine cue jailla jira, cue Moo Joreñoña omoi dine cue oretaja mei, cue finua baifemo finoitomoi. <sup>13</sup>Cue Moo uai siñonana omoi uiñollena, buena cue díbeido cue Moomo omoi jicaia, nana iena finoiticue. <sup>14</sup>Cue díbeido omoi jicaia, iena finoiticue. <sup>15</sup>Cuena omoi isirua, cue llogacinuaina iñoitomoi. <sup>16</sup>Ie Joreño omoimo fecallena cue Moomo jiiiticue. Naie Joreñođi omoína canoite. Omoi diga jaca iite. <sup>17</sup>Uanaicinona llocabite. Naimiena naimaci uiñoñena jira, cuena iñoñedino naimiena feiñoñidimaci; iadedi naimie omoi diga illa jira, naimiena uiñotomoi. Omoi diga jaca iite. <sup>18</sup>Omoína fainonocaiñeiticue; ia dane biiticue. <sup>19</sup>Nano nigarui illanona, cuena iñoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iitomoi. <sup>20</sup>Fiodaillamona cue jillua mei, cue Moomo cue duillana raise uiñotomoi. Cuemo omoi duillana jiai raise uiñotomoi. Omoimo cue duillana jiai raise uiñotomoi. <sup>21</sup>Cue llogacinuaina omoi isirua, cuena isiruitomoi. Ie jira cue Moodi omoína jiai isiruite. Omoína jiai isiruiticue. Omoína cuena uiñotaiticue.

<sup>22</sup>Iscariotena mamecifeñede Judas naimiemo jicanote:

—Nama, ¿bue ñiellena dani caina ona uiñotaitio; iadedi jiaie cominina ona uiñotañeitio?

<sup>23</sup>Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacinuaina iñoite. Cue Moo

naimiena isiruite. Iemona naimiena nabaiticoco. <sup>24</sup>Bu cuena isiruiñenia, cue llogacinuaina iñoñede. Cue llogacinodi cuejeñede. Cue Moo ie. Naimie cuena oretate. <sup>25</sup>Omoi diga nia cue illamona, bie llogacinuai omoimo jai lloticue. <sup>26</sup>Cue Moodi omoína canollena, naga rafuena omoína llofuellena, cue facaina ie Joreña omoimo oretate. Omoína nana omoimo llogacinuaina comecitaite. <sup>27</sup>Cue Moo dine jaiticue; iadedi omoi comeciaina uri itataiticue. Cuena iñoñedino omoi comeciaina iese itatanidimaci. Jarire iñeno. Jaciruiñeno. <sup>28</sup>Ailli cue llwana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isiruia, cueri iobitomoi. Cue Moo cue afemo ite. <sup>29</sup>Bie rafue cuemo nia suiñenia, uicodo omoimo iena jai lloticue. Naie sua, cuena fainonocaiñeno omoi jaillena jitaicue. <sup>30</sup>Omoi diga are nia ñaiñeiticue. Cuena iñoñedino anamo itimie cuena jai duere finoacade. Taifena ñaiticue. Naimie anamo iñedicue; <sup>31</sup>iadedi cue Moona cue isiruillana cuena iñoñedino uñollena, cue Moo cuemo llua isoi, finoiticue. Mai cai jailli.

#### Uvas railla riará ie rafue

**15** <sup>1</sup>Jesús nia llofuate: —Cue díbeimo marena omoi illena omoi raise uñollena, jiaie rafuedo iena llofueiticue. Uvas railla ua riaradicue. Cue Moodi uvas railla riará sedaraima. <sup>2</sup>Cue amena igailaidomoi. Llisíñede igai cue Moo cugaica. Eo llisillena, naga lliside igaina janore muido jaigaica. Ie isoide. <sup>3</sup>Cue llogacinuaido jaillamona, jai jaigaica isoidomoi. Iemona omoi comeciai jai jeanide. <sup>4</sup>Cuena nabai. Ona jiai nabaiticue. Naie amenamo jai duiñena jira, daje díbegaise jaitaca igaidi jai

llisíñede. Ie isoide. Cuena omoi nabaicabiñenia, llisíñede igai isoidomoi. Ie jira cuena nabai. <sup>5</sup>Uvas railla riaradicue. Cue amena igailaidomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisíñede isoidomoi. Cuemo omoi duiñenia, cue jitailla isoi mare rafuena jaca finoñeitomoi. <sup>6</sup>Jai duide igailai safenailla mei, marañena jira, jobaillena, danomo ofitaticai. Cuemo duiñedimie jai duide igai isoide. Jusiñamuimona duere sefuite. <sup>7</sup>Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoi. <sup>8</sup>Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie díbeimo naimaci raise illena ñaite. Mare rafuena naimaci finocana jaillena ñaite.

<sup>9</sup>Nia llofuate:

—Cuena cue Moo isiruilla isoi, omoína isiruiticue. Cuena nabaicabi. <sup>10</sup>Cue Moo llogacinuaina cue iñuamona, naimie isiruillacino anamo iticue. Cue Moo llogacinuaina omoi iñuamona, cue isiruillacino anamo itomoi. <sup>11</sup>Cue isoi omoi comeciai eo caimarellena, bicinuai omoimo lloticue. <sup>12</sup>Dane bie rafuena lloticue. Omoína cue isiruilla isoi, coninina omoi isirui. <sup>13</sup>Naimaci o isiruillamona, o nabaiñiaí facaina o fodaia, naimacina eo ua isiruitio. <sup>14</sup>Cue llogacinuaina omoi iñoia, cuena nabaidomoi. <sup>15</sup>Omoína “Cue mullaiaidomoi” jaca rañedicue; iadedi omoína “Cue nabaiñiaidomoi” birui raiticue. Mullaiaí imaci patrón finoca rafuena uñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uñotomoi. <sup>16</sup>Cuena fetonedomoi; iadedi omoína fetodicue.

Omoi lliside isoicabillana omoïmo jai lloticue. Ie mei buena cue mamecido cue Moomo omoi jicaia, omoïmo fecaite. <sup>17</sup>Coninina omoi isiruillena jai lloticue.

### Comini Jesúna enoilla rafue

<sup>18</sup>Jesús nia llofuede:

—Cuenta iinoñedino omoína enoia, nano cuenta jai enoidimaci. Iena uiñotomoi. Omoína nia enoiñenia, cuenta jai enoidimaci. <sup>19</sup>Naimacimo jainaiaidomoina, omoína isiruitimaci; iadedi naimacimo omoi jainaiaañena jira, omoína cue fetua jira, omoína enoidimaci. <sup>20</sup>Omoïmo jai lloticue. Illaïma duere sefuiá, naimie anamo itino jiaï duere sefuidimaci. Ie isoide. Cuenta comini duere finua isoi, omoína jiaï duere finoitimaci. Cue llofuiacinona naimaci iïnua isoi, omoi llofuiacino jiaï iinoitimaci. <sup>21</sup>Cuenta oretatimiena naimaci uiñoñena jira, cue muidona iese finoitimaci. <sup>22</sup>Naimacimo ite jeacinona naimacimo lloñedicuenta, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. <sup>23</sup>Cuenta enoidimiedi cue Moona jiaï enoide. <sup>24</sup>Eo siño rafuena naimaci motomo finodicue. Buna cue isoi jaca finoñede. Iena finoñedicuenta, naimacimo ite jeacinona uiñoñedimaci. Cue siño finoca rafuena jai ciodimaci. Ie jira cuenta enoidimaci. Cue Moona jiaï enoidimaci. <sup>25</sup>Naimacina David micori jaie llote: “Naimacimo buena finoñedicue; ia cuenta enoidimaci”. Naie cuegafuiaï jai suide.

<sup>26</sup>Cue Moo ie Joreño omoïmo oretaite. Ie Joreño omoína canoite. Omoína uanaicinona uiñotaite. <sup>27</sup>Cue nano lluaruimona cue diga omoi illa jira, cue facaisena jiaï raise lloitomoi.

### Judúuai illaicomini Jesús llofueoicaiganona duere finua rafue

**16** <sup>1</sup>Jesús nia llofuede:  
—Danomo abido omoi jaiñellena, cue uaina omoi faïnonocaiñellena, bicinuai omoïmo ja lloticue. <sup>2</sup>Omoi ofiracomona illaicomini omoína dotaitimaci. Jiaïruido omoína meiniamona: “Jai Jusiñamuina marena sedadicaï”, comeciaina facaitimaci. <sup>3</sup>Cuenta naimaci iinoñena jira, cue Moona jiaï naimaci iinoñena jira, iena finoitimaci. <sup>4</sup>Bie rafue omoïmo sua, naie facaise cue lluaña omoi começillena, omoïmo birui lloticue. Omoi diga cue illa jira, navui iena lloñedicue; iadedi omoïmona birui oni jaiticue.

### Jesús Jusiñamui Joreñoña llua rafue

<sup>5</sup>Jesús nia llofuede:

—Cuenta oretatimie dine ja jaiticue; iadedi omoïmona buna: “¿Nine jaitio?” cuemo jaca nia jicanoñede. <sup>6</sup>Omoïmo bie rafue cue llua jira, omoi comeciáï eo sure ite. Ie jira cue jaillinona jicanoñedomoi. <sup>7</sup>Uanaï lloticue. Cue jaja, mare. Cue jaiñenia, omoína canoraïma omoi dine biñeite. Cue jaja, omoi dine naimiena oretaiticue. Jusiñamui Joreñodi omoi canoraïma. <sup>8</sup>Naimie bia, cuenta iinoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiaï uiñotaite. <sup>9</sup>Cuenta naimaci iinoñenia, naimacina naimacimo jeacino nia illana uiñotaite. <sup>10</sup>Cue Moo dine abido cue jaillinona, cuenta cioiñeitimaci; ia iemona Jusiñamui Joreño cue uaina siñonana uiñotaite. <sup>11</sup>Fiodaillemona jilloiticue. Iemona

cuenta hinoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uñotaite. <sup>12</sup>Diga rafue omoimo nia lloiacadicue; iadedi jai rairairaidomoi. <sup>13</sup>Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. <sup>14</sup>Omoína cue rafuena uñotaite. Ie jira cuenta iobitaite. Nana cue Moomo ite uaidi cueje. <sup>15</sup>Ie jira bie rafuena lloticue. Jusiñamui Joreño omoína cue rafuena raise uñotaite.

#### Sunaillamona caimare illa rafue

<sup>16</sup>Jesús nia llofueite:

—Dallu illanona cuenta cioñeitomoi. Ie mei dallu illanona, cuenta dane cioitomoi.

<sup>17</sup>Ie llofueoicaiganodicaimona damierie dani coninimo jicanodosite:

—¿Niese caimo llote: “Dallu illanona, cuenta cioñeitomoi. Ie mei dallu illanona, cuenta dane cioitomoi. Cue Moo dine jaiticue?” <sup>18</sup>¿Buena caimo llote? Raise cacañedicai.

<sup>19</sup>¿Cai jicanuana Jesús uñuanona, naimie jicane:

—¿Cue llua raise uñoiacadomoi?

<sup>20</sup>Cuemo suille rafue suia, eo eeditomoi; iadedi cuenta hinoñedino eo iobitimaci. Sunaitomoi; iadedi jiairuido caimare iitomoi. <sup>21</sup>Jiaie uaido iena lloticue. Riño jocoacania, naiñaiño jigico isiredé. Jocua mei, naiñaiño urue jeiciamona, isirenadi feibicaide. Iemona jai iobide. <sup>22</sup>Ie isoide. Ja sunaitomoi; iadedi dane omoína cioiticue. Fiodaillamona cue jillua mei, dane cuenta cioitomoi. Ie mei caimare iitomoi. Iemona omoína buna sure itatañeite. <sup>23</sup>Nairuimo cuemo buena jicañeno; iadedi cue Moomo jica.

Ie mei cue muidona naimie omoimo fecaite. <sup>24</sup>Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

#### Jiairuido Jesús marefodo llua rafue

<sup>25</sup>Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue.

Omoína cue Moona marefodo lloticue.

<sup>26</sup>Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi.

<sup>27</sup>Omoína naimie isiruillamona, omoimo fecajite. Cuenta omoi isiruilla jira, cue Moomona cue billana omoi iñua jira, cue Moo omoína isiruite.

<sup>28</sup>Cue Moomona enruemo biticue.

Naimie dine abido jaiticue.

<sup>29</sup>Lloticai:

—Jai marefodo caimo llotio. O uaina meidocana jai uñedio. <sup>30</sup>Nana rafuena o uñuana uñoticai. Cai comeciaino iticinona o uñuamona, caina raise uñotio. Iemona Jusiñamuimona o billana jai iñoticai.

<sup>31</sup>Jesús uai ote:

—Cuenta jai iñotomoi. <sup>32</sup>Jiairuido, ua birui, oni tuuitomoi. Nagamiiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. <sup>33</sup>Cuenta omoi iñuano, omoi uri illena, omoimo bie lloticue. Enruemo omoi ia, jaca duere sefuitomoi; iadedi omoi comeciaina ocuiño. Omoína duere finodinona jai cue emodofilla jira, omoi comeciaina ocuiño. Naimaci baifemo faiticue.

#### Jesús ie Moo diga ñaia rafue

**17** <sup>1</sup>Jesús bicinona llua mei, monamo eruailano, jiñde:

—Moo, cue fiodaiacanarui jai ride. Cue uai siñonana uñota. Iemei o uai



siñonana jiai uñotaiticue. <sup>2</sup>Nana comini afemo cuena jai itatatio. fimana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. <sup>3</sup>Ona nanoca Jusiñamuina uñoitimaci. Jai cuena o oretajana jiai uñoitimaci. <sup>4</sup>Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. <sup>5</sup>Ore Moo, enirue nia iñena facaiseconi o diga iticue. Illaïma isoi o ecimo dane ebire iacadicue. Dane cuemo ine, daje isoi coco illesa. <sup>6</sup>Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena iinocana jaidimaci. <sup>7</sup>Nana cuemo ite rafue omona feiñoticue. Iena jai uñotimaci. <sup>8</sup>Nana cuemo o llogacinuaina naimacimo jai lloticue. Jai iñotimaci. Omona cue billana jiai jai iñotimaci. Cuena o oretajana jiai iñotimaci. <sup>9</sup>Naimaci facaina birui jiidicue. Naimacina cuena iñotadio. Ie jira omo jai duidimaci. Ona iñoñedinò facaina birui jiiñedicue. <sup>10</sup>Nana o dibeimo itinodi cueje. Nana cue dibeimo itinodi oie. Nana naimaciri iobidicue. <sup>11</sup>Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci fñoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. <sup>12</sup>Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraima micori cuegafuiiai suillena, naimie ua faifite. <sup>13</sup>O dine ja jaiticue. Cue isoi naimaci comeciai eo caimare illena,

naimacimo ailluena rafuena jai lloticue. <sup>14</sup>O llogacinuaina jai lloticue. Ona iñoñedinomo naimaci jainaiañena jira, ona iñoñedinò naimacina enoidimaci. Ona iñoñedinomo jiai jainaiañedicue. <sup>15</sup>Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. <sup>16</sup>Ona iñoñedinomo jainaiañedicue. Ona iñoñedinomo jiai jainaiañedicue. <sup>17</sup>O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata. <sup>18</sup>Bene cuena o oretaja isoi, ona iñoñedinò dine naimacina oretaticue. <sup>19</sup>Uanaicinona naimaci uñuamona, naimaci comeciai marebicaillena, cuena iñotino facaina fiodaicadicue. <sup>20</sup>Bimacina birui dane jiiñedicue; iadedi bimaci cue rafuena ico lloia, jiaie comini cuena iñoitimaci. Cuena ico iñoitino facaina birui jiai jiidicue. <sup>21</sup>Daajedicoco. Coco illa isoi, naimaci comeciaina daje isoi lloillena, nana naimaci facaina jiidicue. Daje isoi comeciai lloillamona, cuena nia iñoñedinodi iñoitimaci. Iemona cuena o oretajana iñoitimaci. <sup>22</sup>Cuomo o iga uaidi ebirede. Naimaci comeciai lloillena, naimacimo o uai jai cue iga. <sup>23</sup>Naimaciri dajedicai. O diga daajedicoco. Naimaci comeciai daje isoi lloillana jitaidicue. Iemona cuena iñoñedinò bene cuena o oretajana uñoitimaci. Cuena o isiruilla isoi, naimacina o isiruillana jiai uñoitimaci. <sup>24</sup>Ore Moo, naimaci cue dine illena jitaidicue. Enirue nia iñenia, illaïma isoi o ecimo ebire jiaie iticue. Dane ie isoi ebire birui cue ia, naimaci cuena ciuana jitaidicue. <sup>25</sup>Ore Moo, mareuidimiedio. Jiaie comini ona uñoñedinomaci; iadedi ona uñoticue. Cue llofueoicaiganodi o cuena oretajana jai uñoitimaci.

<sup>26</sup>Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jiiide.

**Jusúna gaitalle rafue**

(Mt. 26.47-58; Mr. 14.43-54;

Lc. 22.47-54)

**18** <sup>1</sup>Jiia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiái illanomo raiona jaide. <sup>2</sup>Jesús cai diga nainomo jaisoilla jira, Judas micori naie illanona jiai uiñote. Jesúna gaitatallena nainomo Judas jaide. <sup>3</sup>Soldaduái diga policías diga jaide. Naimacina ifode. Jusiñamui diga nanoca ñairaiñi naimacina oredimaci. Fariseuái naimacina jiai oredimaci. Soldaduáidi lamparíñiari bitimaci. Reinañiari jiai bitimaci. Sidaniari jiai bitimaci. Judas naimacina ifode. <sup>4</sup>Jesúdi nana naimiemo suille rafue uiñuanona, naimaci dine billano, jicanote:

—¿Buna jenodomoi?

<sup>5-6</sup>Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

<sup>7</sup>Jesús dane jicanote:

—¿Buna jenodomoi?

Uai otimaci:

—Nazaret ie Jesús.

<sup>8</sup>Jesús uai ote:

—Omoimo jai lloticue: “Imiedicue”.

Cuena omoi jenoia, cue diga itino oni jaillena rairuiño.

<sup>9</sup>Naimie ie Moomo como lloga uai suillena, iese llote. Iese ie Moomo como llote: “Cuena o ñinotaganomona jaca buna faifiñedicue”. <sup>10</sup>Ie daacaiño Simón Pedrodi iese lloebi llinocaida, Jusiñamui diga nanoca

ñairaima mullaíma jefona jaibonote. Naie mullaíma mamecidi Malco. <sup>11</sup>Iena ciuanona, Jesús Pedromo llote:

—O lloebina eeno. Cue Moo jitailla isoi, fiadaiticue.

<sup>12</sup>Ie mei soldaduái, imaci capitán diga, judíuái imaci policías diga, Jesúna gaitajano, naimiena maitimaci. <sup>13</sup>Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. <sup>14</sup>Navui Caifás judíuái illaicominimo llote: “Damie nana cai comini facaina fiadaitena, mare”.

**Pedro Jesúna nano janua rafue**

(Mt. 26.69, 70; Mr. 14.66-68;

Lc. 22.55-57)

<sup>15</sup>Simón Pedro Jesús jinafo racade. Jiai racadicue. Cuena Jusiñamui diga nanoca ñairaima uiñua jira, ie nairairirimo Jesús diga jaidicue; <sup>16</sup>iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño mo jicanoticue. <sup>17</sup>Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

<sup>18</sup>Rosirena jira, naie jofo mullaíai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

**Jesús Anás dine illa rafue**

(Mt. 26.59-66; Mr. 14.55-64;

Lc. 22.66-71)

<sup>19</sup>Ie facaise Anás Jesúmo ie llofueoicaiganodicaina jicanote. Ie llofuiacinuaina jiai jicanote. <sup>20</sup>Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. <sup>21</sup>¿Bue ñellena birui cuemo

jicanotio? Cuenca cacadinomo iena jicano. Cue llofuiana uinotimaci.

<sup>22</sup>Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

<sup>23</sup>Jesús dinena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

<sup>24</sup>Jesús uai oñede. Iemei Anásdi Caifás jofomo Jesús maianona orede.

**Pedro Jesúsna dane janua rafue**

(Mt. 26.71-75; Mr. 14.69-72;

Lc. 22.58-62)

<sup>25</sup>Te facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

<sup>26</sup>Naie facaise daje mullaima Pedromo llote:

—Aceitunas railla riaraiiai illanomo ona ciodicue —llote. Jusúna soldaduai gaitaja facaiseconi Pedro naie mullaima ie come jefona ailli jaibonote, soldaduai Jesúsna gaitaja ie daacaiño. <sup>27</sup>Pedro dane janote. Iecon iitava ñaite.

**Jesús Pilato dine illa rafue**

(Mt. 27.1-2, 11-14; Mr. 15.1-5;

Lc. 23.1-5)

<sup>28</sup>Ie mei Caifás jofomona gobernador jofomo Jesúsna jitrano uitimaci. Naie facaise gobernardordi Pilato. Naimiedi judúuaiñedimie. Naimaci einamaci rairuilla jira, judúuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega. <sup>29</sup>Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

<sup>30</sup>Uai otimaci:

—Bimie marañede rafue finoñedena, o dine naimiena atiñedicai.

<sup>31</sup>Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llo timaci. <sup>32</sup>Navui Jesúsdi: “Cuenca cruzmo coraiitimaci” llote. Naie llucino jai suisaide.

<sup>33</sup>Pilato fo abido jaillano, Jesúsna uaiduano, naimiemo llote:

—Judúuai illaima raillamedio.

<sup>34</sup>Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

<sup>35</sup>Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Nie isoide marañede rafuena finodio?

<sup>36</sup>Jesús uai ote:

—Eniruemo cominina sedañedicue. Judúuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

<sup>37</sup>Pilato uai ote:

—Ie jira odi illaimadio.

Jesús uai ote:

—Jaca railla. Uanaicino llo llona, jeicigacue. Nana uanaicinona jitaídino cue llua na cacadimaci.

<sup>38</sup>Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo iñede.

**Jesúsna coraiacana rafue**

(Mt. 27.15-31; Mr. 15.6-20;

Lc. 23.13-25)

<sup>39</sup>Pilato nia llote:

—Naga año pascua railla rafue illa facaise, damie cárcelmona jino ollena,

cuemo jicanuaibisoidomoi. Bie año omoi jitaia, omoi illaïma raillamiëna marena oretaiticue.

<sup>40</sup>Comini ðinena cuiridimaci:

—Dama ite. Bimiëna jitaïñedicai.

Barrabásna cárcelmona marena jino oreta. —Iese cuiridimaci. Barrabásdi ñiriraiëma.

**19**<sup>1</sup>Ie mei Pilato Jesúna oni uillanona, naimiëna sechedotade. <sup>2</sup>Jifanodosillena, soldaduai eecuaimona finoca nuiciraina naimie ifogimo jitaðimaci. Jiduirede iniroina jitaatajano raitimaci:

<sup>3</sup>—Judúuai illaïmadio. —Iemei ie uiecona bucoïdimaci.

<sup>4</sup>Pilato dane jino billano, raite:

—Naimie omoi ðine jino ja biite.

Naimiemo nicinodi ññede —raite.

<sup>5</sup>Ie facaise Jesús jino bite. Eecuaimona finoca nuiciraina jitaça. Jiduirede iniroina jitaça. Pilato naimacimo llote:

—Jadi, naimie.

<sup>6</sup>Jusiñamui diga nanoca ñairainidi, jiaie illaïcomini diga, naimiëna ciuano, cuiridimaci:

—Naimiëna corai.

Pilato llote:

—Naimiemo nicinodi ññede; ia oni uillanona, naimiëna omoi corai.

<sup>7</sup>Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitaðimie. Caimona naimiedi maraññede rafue jai finode.

<sup>8</sup>“Naimiedi Jusiñamui Jito” comini raillana Pilato cacajano, eo jacinaite.

<sup>9</sup>Jesúna dane fo uite. Jesúdi Jusiñamui Jitona naimie raise uññollena, Jesúmo jicanote:

—¿Ninena bitio?

Jesús uai oñede. <sup>10</sup>Ie jira Pilato dane jicanote:

—¿Bue ñellena cue uaina oiacaïñedio? Uai cuemo ite, o marena oretallena. Uai cuemo ite, ona coraitallena.

<sup>11</sup>Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino ñnodimaci.

<sup>12</sup>Ie facaimona Pilato Jesús marena jino oretaiacade; iadedi judúuai illaïcomini ðinena curiisite:

—Bimie o jino marena oretaiã, cai nanoca illaïma ie nabaiñedio.

“Illaïmadicue” Jesús lluaïmona, cai nanoca illaïma ðibeimo naimiedi ññede. Cai nanoca illaïmadi César.

<sup>13</sup>Comini lluaña cacajano, Pilato Jesúna jino atide. Ie cominimo lloranomo raide. Naie illano nofinina mameciredo. Judúuai uaido Gabatana mameciredo. <sup>14</sup>Pascua rafue guilla ñnoraruimo jítoma naidai illanona, Pilato ðinena llote:

—Jadi, omoi illaïma.

<sup>15</sup>Iemona cominidi curiisite:

—¡Naimie oni uillanona, naimiëna meine! ¡Naimiëna corai!

Pilato jicanote:

—¿Bue ñellena omoi illaïmana coraiticue?

Jusiñamui diga nanoca ñairaini uai otimaci:

—Cai illaïmadi César. Jiaie illaïmadi caïmo ññede. Jaca dallaiãmade cai illaïmadi.

<sup>16</sup>Ie mei Pilato naimacimo naimiëna fecade, coraïllena.

**Jesúna coraiacana rafue**  
(Mt. 27.32-56; Mr. 15.21-41;  
Lc. 23.26-49)

Pilato llua jira, Jesúna uitimaci coraïllena. <sup>17</sup>Jesúdi ie cruzna rocaïcaïda sonode. Ifocoraïna eruaiãlla mameciredo illanomo jaidimaci. Judúuai

uaido naie illano Gólgotana mameciredé. <sup>18</sup>Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo. <sup>19</sup>Cruzmo jonellena, Pilato rabricimo cuetatate: “Nazaret ie Jesús. Judíuai Illaíma”. <sup>20</sup>Judíuai uaido cuega. Romanos comini uaido jiaí cuega. Griego uaido jiaí cuega. Jesús coraiano Jerusalén ianori illa jira, ailluena comini iena ciodimaci.

<sup>21</sup>Iena ciuamona, naie rabricina meidollena, Jusiñamui díga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaidicai. Bimie dinena raisoide: “Judíuai Illaímadicue” raillanona, o cuetatajana jitaidicai

<sup>22</sup>Pilato uai ote:

—Jai cuetataticue. Jiaie rabricimo dane cuetatañeiticue.

<sup>23</sup>Jesúna coraíe mei, soldaduai naimie iniroi uanona, naga soldado dígamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. <sup>24</sup>Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloraima micori cuegafuiai suide. Jaié cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

<sup>25</sup>Cruz abimo Jesús ei, ie euiño díga ite. Cleofas aidi ite. Naiñaiño mameci María. María Magdalena jiaí ite. <sup>26</sup>Jesús ie eina ciode. Cuená naiñaiño ecimo jiaí ciode. Cuená eo gaide. Ie jira ie eimo llote:

—Jadi, o jito isoi itimie anamo iitio.

<sup>27</sup>Cuemo llote:

—Jadi, o ei isoidiñaiño anamo iitio.

Naie dacaíño naiñaiñoña cue jofomo uillanona, naiñaiñoña sedadicue.

<sup>28</sup>Ie mei Jesús nana rafue jai fuillana uiñuano, llote:

—Jiroacadicue. —Iese lluanona, Jusiñamuina lloraima micori jaié cuegafuiai jai suide. <sup>29</sup>Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. <sup>30</sup>Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

### Jesús sida díga ducia rafue

<sup>31</sup>Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui

nia illanona, sábadorui jai raire taineacana jira, coraicano cruzmo sábadoruimo illana jitaiñedimaci.

<sup>32</sup>Soldaduai jaillano, Jesús ecimo coraica iaimaiai idaiaina ue llude.

<sup>33</sup>Jesús dine billano, naimie jai fiodaillana ciodimaci. Ie jira naimie idaiaina uelluñedimaci; <sup>34</sup>iadedi daje soldado Jesús ciraigiconi sida díga

ducide. Naifo diaide. Naifomona jinui jiaí bite. <sup>35</sup>Nana iena ciodicue. Uanai lloticue. Omoi inollena, iena lloticue.

<sup>36</sup>Soldaduai iese finuamona, jaié cuegafuiai jai suide. Jaié Jesúsna cuega: “Naimie illaicina tainoñeitimaci”. <sup>37</sup>Jiaí jaié cuega: “Judíuai dinena naimaci ducitagamiemo ico eruaitimaci”.

### Nofici ifomo Jesús raia rafue

(Mt. 27.57-61; Mr. 15.42-47;

Lc. 23.50-56)

<sup>38</sup>Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúna

bainino ñnote. <sup>39</sup>Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. <sup>40</sup>José, Nicodemo diga, Jesús abina useroina ferinotiaimaia. Naimaci comini finouilla isoi, naie siorede radi iniroimo jonega. <sup>41</sup>Amenaia iaire illanomo Jesúdi coraica. Nainomo nofici ie raiafodi ite. Nia buna naifomo raiafona. <sup>42</sup>Naifo iaire illa jira, sábadorui jai riacana jira, jiaie raiafo jenollena abi juanina jira, nainomo naimiena jonetiiaimaia. Nofici diga raiafo raise ibaila mei, jofomo jaidiaimaia.

**Fiodaillamona, Jesús jillua rafue**  
(Mt. 28.1-10; Mr. 16.1-8; Lc. 24.1-12)

**20** Domingo jitiramo nia monañenia, raiafomo María Magdalena jaide. Raiafo ibaila nofici oni joillana ciode. Jesús abina cioñede. <sup>2</sup>Ie jira aiscana Pedrona jenuaide. Cuen a jai jenuaide. Baillano, llote: —Cai illaicomini cai Nama abina raiafomona otimaci. Naimiena jonianona uiñoñedicue. <sup>3</sup>Ie mei raiafomo jaidicoco. <sup>4</sup>Aiscana jaidicoco; iadedi riire cue aiscana jailla jira, nano ridicue. <sup>5</sup>Ana bitadacaida, fo erodaticuemo, useroi joillana ciodicue; iadedi fo jaiñedicue. <sup>6</sup>Ie mei Simón Pedro rillano, fo jaide. Useroi joillana jiai ciode. <sup>7</sup>Ie ifogimo ferinoga iniroi eneno illana ciode. Raise nacuana ciode. <sup>8</sup>Iemei jiai fo jaidicue. Iniroina ciuamona, Jesús jai jilluana ñnoticue. <sup>9</sup>Jaie cuegafuiai llote: “Fiodaillamona jilloite”. Naie cuegafuiana como raise ñnoticoco. <sup>10</sup>Ie mei jofomo jaidicoco.

**María Magdalenamo**  
**Jesús bairia rafue**  
(Mr. 16.9-11)

<sup>11</sup>Raiafomo abido billano, coco jailla mei, nainomo María fiebide. Eede. Ana

bitadacaida, fo erodatemo, <sup>12</sup>Jusiñamuimona mena jaienici jai billana ciode. Userede iniroi jitadiaimaia. Jesúna navui jonianomo ana raidiaimaia. Damie ifogi dibeimo raide. Jiaimie eilli dibeimo raide.

<sup>13</sup>Naiñaiñomo jicanotiaimaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

<sup>14</sup>Naie facaise jinafo dine erocaillanona, Jesúna ciode; iadedi naimiena uiñoñede. <sup>15</sup>Naiñaiño comecina facade; “Naimiedi bie illano sedaraima”. Jesús naiñaiñomo jicanote: —¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

<sup>16</sup>Jesús dinena uai ote:

—¡María!

Naimie dine naiñaiño como raise dobaicaide. Judfúai uaido llote:

—¡Raboni! —Naie uai oni dobaiñuamona: “Llofueraima”.

<sup>17</sup>Jesús uai ote:

—Cuen lliñoñeno cuena faicai. Cue Moo dine nia a jaiñedicue. Cue amatiai dine mai jaillanona, cue rafuena luai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

<sup>18</sup>Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiñomo luana llote.

**Jesús ie llofueoicaiganomo**  
**bairia rafue**  
(Mt. 28.16-20; Mr. 16.14-18;  
Lc. 24.36-49)

<sup>19</sup>Domingo naio Jesús llofueoicaiganodicai jofomo ofidicai.

Judfuaí illaicominina cai jaciruillamona, nasiaí nana cai ibaica. Nase econoñeno ieconi Jesús cai motomo billanona, caina uaiduano, llote:

—Uri omoi i.

<sup>20</sup>Je onollina acatate. Je ciraigina jiaí acatate. Cai Namana jai cai ciuari eo iobidicai. <sup>21</sup>Jesús dane llote:

—Uri omoi i. Cue Moo cuena oretaja isoi cue rafuena lollena, omoína oretaiticue.

<sup>22</sup>Je facaise caina firaiñuanona, raite:

—Jusiñamui Joreñona omoi feiñuana jitaicue. <sup>23</sup>“O jeacinona jai dotade” bumo omoi lloia, Jusiñamui jai dotaca. “O jeacinona nia dotañede” bumo omoi lloia, Jusiñamui nia dotañega.

<sup>24</sup>Naie naio Tomásna mameciredede llofueoicaigamie cai diga ñede. Dídimona jiaí mameciredede. Naimiedi gorasa. <sup>25</sup>Naimiemo lloticai:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñinoñeiticue.

#### Jesús ie llofueoicaiganomo dane bairia rafue

<sup>26</sup>Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiaí ibaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoi i.

<sup>27</sup>Iemei Tomásno llote:

—Eroda cue onollimo. Naifo jeta.

Ciraigi ifona jiaí jeta. ñinoñeno jaiñoeno. Mai ñino.

<sup>28</sup>Tomás uai ote:

—Cue Namadió. Cue Jusiñamuidió.

<sup>29</sup>Jesús dane uai ote:

—Cuena o ciua jira, cuena ñinotio; iadedi cuena cioñedino cuena ñinoia, jiaí caimare iitimaci.

<sup>30</sup>Jesús diga siño rafuena finode. Iena ciodicai. Nana naie rafuena bie rabenicomo cueñedicue; <sup>31</sup>iadedi dajerie cueticue. Jesúdi cai Jilloitaraimana omoi ñinollena, iena cueticue. Naimiedi Jusiñamui Jitona omoi ñinollena, iena jiaí cueticue. Naimiena omoi ñinuano, naimie diga jaca iitomoí.

#### Jesús ie llofueoicaiganomo ane bairia rafue

**21** <sup>1</sup>Diga irui illanona, Tiberfana mameciredede jorai fuemo Jesús ie llofueoicaiganodicaimo dane bairede. <sup>2</sup>Nainomo diese iticai: Simón Pedro, Tomás, Natanael, cue ama Jacobo, cue, jiaie iaimaiaí. Tomás mameci jiaicidi Dídimó. Natanael Galilea ie Caná nairai imie. <sup>3</sup>Simón Pedro caimo llote:

—Lloiji faiaiticue.

Naimie uai oticai:

—O diga jaiticai. —Iese raillano, botemo jaidicai. Namona naio lloijina faiticai; ia jaca buena oñedicai.

<sup>4</sup>Monaicademo, Jesús jorai fuemo bite; iadedi naimiena uíñoñedicai. <sup>5</sup>Jesús caimo jicanote:

—Caímaci, ¿nie diese lliciaína jai otomoi?

Uai oticai:

—Jaca oñedicai.

<sup>6</sup>Naimie dane uai ote:

—Omoi bote nabei ñine omoi lloijina faíno.

Ie jira faiticai. Ailluena lliciaí naiemo jilla jira, a aiñoñidicai. <sup>7</sup>Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jítade. Jesús ñine naimie raire rillena, joraimo daiade; <sup>8</sup>iadedi botedo biticai. Enirue iaie illa jira, na lliciaimo sonocana, lloijina atidicai. Nibaí cien metros oni ite. <sup>9</sup>Jorai fuemo cai ria, cocimona bonoca iraina

ciodicai. Lliciaí iraimo ruica jai ite.  
Llomenico jiai ite. <sup>10</sup>Jesús caimo llote:

—Omoi oga lliciaimona janore ati.

<sup>11</sup>Ie jira Simón Pedro botemo jaillano, lloijina llínuanona, enirue mo ari sonode. Ciento cincuenta y tres jemierie jítaticai. Ailluena ite; iadedi lloiji cuarariñede. <sup>12</sup>Jesús llote:

—Mai guisaibi. —Jesúna cai uñua jira: “¿Budío?” jaca buna raiñena. <sup>13</sup>Jesúdi llomenico diga lliciaína caína ecade. <sup>14</sup>Fiodaillamona jillua facaisemona dacaiño amani caimo Jesús jai abina bairetate.

#### Jesús Pedro diga ñaia rafue

<sup>15</sup>Guilla mei, Jesús Simón Pedromo llote:

—Simón, odi Juan jítodio. —Jiai jicánote— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena iñnotinona raise seda. Naimacina cue rafuena raise llofue.

<sup>16</sup>Dane llote:

—Simón, odi Juan jítodio. —Dane jicánote— ¿Cuena isiruitio?

Simón uai ote:

—Jii, Nama, ona cue isiruillana uñotio.

Jesús dinena uai ote:

—Toica llaudaiai uruiaina omoi raise sedaja isoi, cuena iñnotinona seda.

<sup>17</sup>Dane jicánote:

—Simón, ¿cuena isiruitio? —Jesús naimiemo dane jicánua jira, “Jesús cue uaina iñoñede” raillanona, Pedro comeci sunaite.

Uai ote:

—Nama, naga rafuena uñotio. Ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena iñnotinona seda.

<sup>18</sup>Daje rafue omo nia lloiticue. O nia conirue facai o iniroi dama jítadio. Ie mei o jitaillanomo jaidio. O uaicroma facaiseconi o onolli oni ñuitaitio. Ie mei jiaimie o iniroi ona jítajano, o jitañenanomo ona uite. Cue lluaña iñnocana o jai.

<sup>19</sup>Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

#### Jesús ie gaia llofueoicagamiemo llua rafue

<sup>20</sup>Pedro diga Jesús nia ñaia facaise, Pedro dobaicaillanona, cuena ciode. Iaimaiai jinafona racadicue. Jesús gaiamiedicue. Navui cai guía, Jesús nia fiodaiñenia, Jesús abimo cue ia, Jesúmo jicánoticue: “¿Bu gaitatallio?” <sup>21</sup>“Cuena iñnotinona seda” Pedromo Jesús llua mei, Pedro dobaicaillanona, cuena ciuano, Jesúmo jicánote:

—Nama, ¿niese naimie fiodaite?

<sup>22</sup>Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluaña iñnocana o jai.

<sup>23</sup>Ie jira creyentiai naie lluaña fidiano cuena raitimaci:

—Naimie fiodaiñeite. —Iese raitimaci; iadedi Jesús iese raiñede.

Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup>Nana rafuena ciuano lloticue. Iena cueticue. Uanaicinuaina cueticue.

<sup>25</sup>Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.